

東

華

錄

東華錄目錄

雍正一

起康熙六十一年十一月甲午盡十二月

雍正二

起雍正元年正月盡六月

雍正三

起元年七月盡十二月

雍正四

起二年正月盡六月

雍正五

起二年七月盡十二月

雍正六

起三年正月盡六月

雍正七

起三年七月盡十二月

雍正八

起四年正月盡六月

雍正九

起四年七月盡十二月

雍正十

起五年正月盡六月

雍正十一

起五年七月盡十二月

雍正十二

起六年正月盡六月

雍正十三

起六年七月盡十二月

雍正十四

起七年正月盡六月

雍正十五

起七年七月盡十二月

雍正十六

起八年正月盡六月

雍正十七

起八年七月盡十二月

雍正十八

起九年正月盡六月

雍正十九

起九年七月盡十二月

雍正二十

起十年正月盡六月

雍正二十一

起十年七月盡十二月

雍正二十二

起十一年正月盡六月

雍正二十三

起十一年七月盡十二月

雍正二十四

起十二年正月盡六月

雍正二十五

起十二年七月盡十二月

雍正二十六

起十三年正月盡八月己丑

東華錄

雍正一

臣王先謙敬編

臣周澹蕃恭校

世宗憲皇帝 聖祖第四子也 母孝恭仁皇后吳雅氏原任護

軍參領加封一等公衛武之女端莊恭肅慈惠安和事 聖祖仁

皇帝格襄內治著範宮庭嘉祥肇集嘗夢月入懷華彩四照已而

誕 上康熙十七年戊午十月三十日寅時也誕生之夕祥光煜

燭經久弗散闔宮稱異 上天表奇偉隆準頤身雙耳豐垂目光

炯照音吐洪亮舉止端凝大智夙成宏才肆應允恭克讓寬裕有

容幼耽書史博覽弗倦精究理學之源旁徹性宗之旨天章潛發

立就萬言書法迺雄妙兼眾體每籌度事理評隲人材因端竟委

燭照如神輒略機宜皆所洞悉而性尤純孝婉愉愛慕悉本乎至

誠逮事

孝莊文皇后

孝惠章皇后備膺

慈眷侍奉

聖祖

仁皇帝

孝恭仁皇后盡禮盡敬仰愜歡心偶遇

聖祖違和必

躬親湯藥問視惟虔晝夜無少懈

聖祖常稱爲誠孝焉又誼敦

友愛值二阿哥罪廢眾議當幽禁

上獨涕泣不能起

聖祖爲

之動容平日無私交無黨援無干譽秉道守義巍然自重嘗奉

命隨征統率將士軍紀肅然初封多羅貝勒晉封和碩雍親王每

值鑾駕巡方翠華駐蹕輒命扈行軍國大計亦多諮決禮祀鉅

典恆令恭代

聖祖嘗諭諸大臣曰朕萬年後必擇一堅固可託

之人與爾等作主令爾等永享太平蓋天心默定神器攸歸久矣

○康熙六十一年二月

聖祖二聖躬不豫因回

一月癸酉

聖祖自暢春園幸南苑行圍戊子

聖躬不豫因回

駐暢春園庚寅以冬至屆期將大祀於

南郊命

上恭代

上

於齋所致齋甲午 聖祖疾大漸召 上於齋所遂召誠親王允祉
肅郡王允祐多羅貝勒允禩固山貝子允禔敦郡王允禪固山
貝子允禩皇十三子允祥尙書隆科多至 御榻前宣諭曰皇四
子人品貴重深肖朕躬必能克承大統著繼朕登基卽皇帝位
上聞召馳至趨進 寢宮問安戌刻 聖祖賓天 上慟哭仆地
良久乃起趨至 御榻前撫足大慟親爲 聖祖更衣遵用 孝
莊文皇后製賜御服 上皆敬加於首然後進御恭奉 大行皇
帝還大內安於乾清宮○乙未禮部奏大殮儀注諭 皇考教養
文武大小臣工六十餘年孰不躬沐深恩今一旦升遐悲痛切至
竇出衷忱大殮時著令王貝勒貝子公文武大臣俱入乾清門令
其瞻仰得盡哀戀之情又諭公主王妃豈可遠列丹墀著仍入大
內親近 梓宮使得盡哀朕之兄弟子姪亦令俱入乾清門在丹

陸上隨朕行禮○戊刻 大行皇帝大殮 上痛哭失聲擗踊無數既殮遂行祭奠禮凡尊罍簋簠 上皆躬自陳設奠侑飲食儼如視膳哀感羣臣咸痛哭伏地莫能仰視○諸王大臣奏請諒陰之次或御昭仁殿或御弘德殿諭朕遭 皇考大事哀痛方深何忍安居內殿其以乾清宮東廡爲倚廬自後 上居乾清宮東廡席地寢苦慮 皇太后高年過哀每夜五鼓親詣問安○命貝勒允禩十三阿哥允祥大學士馬齊尙書隆科多總理事務諭朕苦塊之次中心紛沓所有啟奏諸事除朕藩邸事件外餘俱交送四大臣凡有諭旨必經由四大臣傳出並令記檔則諸事庶乎秩然不紊其奏事官員處亦令記檔至 皇考時所有未完事件何者可緩何者應行速結朕未深悉著大臣等將應行速結等事會同查明具奏○諭總理王大臣等西路軍務大將軍職任重重大十四

阿哥允禔勢難暫離但遇 皇考大事伊若不來恐於心不安著
速行文大將軍王令與弘曙二人馳驛來京軍前事務甚屬緊要
公延信著馳驛速赴甘州管理大將軍印務並行文總督年羹堯
於西路軍務糧餉及地方諸事俱同延信管理年羹堯或駐肅州
或至甘州辦理軍務或至西安辦理總督事務令其酌量奏聞至
見在軍前大臣等職名一併繕寫進呈爾等會議具奏尋議諭旨
甚屬周詳應速行文大將軍王將印敕暫交平郡王訥爾素署理
卽與弘曙來京得旨副都統阿爾訥著隨大將軍王來京副都統
阿林保著隨弘曙來京○諭貝勒允禩十三阿哥允祥俱封爲親
王二阿哥之子弘皙封爲郡王○丙申 上哀瘠過甚 皇太后
屢傳諭勸進飲食 上泣奏曰臣若能進飲食必稍進以慰慈衷
諸王大臣奏請節哀並勸進饘粥諭仰思 皇考深恩不但諸王

大臣哀慕無窮凡官員兵民均茲依戀况朕親承鞠育奚能自己
且朕既受付託之重酌量可進飲食朕自少進若勉強飲食反於
朕躬無益嗣後不必勸奏○命蒙古王台吉等未出痘者免其來
京朝謁 梓宮者增給口糧○丁酉頒 大行皇帝遺詔○命速
修景山壽皇殿諭朕受 皇考深恩如天罔極忽升仙馭攀戀無
從惟有朝夕瞻近 梓宮稍盡哀慕之忱今王大臣等所議安奉
之處或在南海子或在鄭家莊此二處隔越郊外離宮禁甚遠朕
心不忍緬惟 世祖章皇帝大事時曾安奉景山壽皇殿朕意亦
欲安奉於景山壽皇殿庶得朝夕前往親行奠獻○諭先因京師
米價騰貴 皇考宵旰焦勞特命朕查視各倉彼時見倉糧充溢
露積不少因請將應行出倉之米迅速辦理蒙 旨俞允朕今仰
體 皇考軫恤民生至意務令米價漸平交與監督張坦麟陳守

創等會同倉場總督帶領工部賢能司官將倉廩確實料估應修補者速行修補應添建者於明歲春初添建所需錢糧動用捐貯驛站銀兩其應否補項之處再議此事並非此時應下之旨係遵奉 皇考原下之要旨是以特諭○諭 皇考念切天下兵民生計因京師米貴焦思極慮當龍馭上賓之時猶惓惓未釋於懷向來口外米穀不准運進口內而燒鍋仍照常開設可速合口外米穀准其進口其開設燒鍋著行禁止○戊戌禮部進 登極儀注上自乾清宮月臺坐御輿出乾清門諭乾清宮安奉 梓宮雖懸設簾幙朕何忍在 皇考前乘輿而出中門著移向乾清門朕出東旁門乘之又奏請 御殿行禮畢例應列坐賜茶諭朕祇承 皇考遺命勉抑哀衷以遵大禮豈忍安坐飲茶卽在朝羣臣亦誰能下咽著停止賜茶又奏捧寶人員應捧玉寶由乾清宮御路

中行諭此寶雖 皇考舊日所御今傳之於朕 梓宮在上豈可

竟由中路而出著由甬路旁行○封固山貝子蘇努爲多羅貝勒

○命兵部尙書白潢協理大學士事務○召工部左侍郎署湖廣

總督滿丕來京在原任侍郎內行走以楊宗仁爲湖廣總督年希

堯署廣東巡撫原任江南安徽布政使○以內廷舊勞贈故大學士張英爲

太子太傅刑部侍郎勵杜訥爲禮部尙書○己亥 上以 大行

皇帝遺詔定制二十七日釋服諭諸王滿漢大臣曰三年持服乃

人子之道若未遂朕志必致慙恨無已爾諸王滿漢大臣宜體朕

意○調張伯行辦理戶部右侍郎錢局事務以李英貴爲總督倉

場侍郎由內務府總管○庚子 上以登極遣官告祭 天 地 太

廟 社稷 奉先殿○禮部奏 皇上登極先詣 皇太后前行

禮畢然後御殿並奏於 皇太后奉 皇太后懿旨皇帝誕膺大

位理應受賀至與我行禮有何關繫况 先帝喪服中卽衣朝服
受皇帝行禮我心實爲不安著免行禮是日王大臣等又繕摺固
請 皇太后仍不允 上又再三懇請奉 皇太后懿旨諸王大

臣等旣援引 先帝所行大禮懇切求請我亦無可如何今晚於
梓宮前行告祭禮至上食奠酒請遣員恭代諭奠酒時朕仍親奠

強自節哀朕得多近 皇考梓宮愈增福祉更復何所避忌明日
上食爾部大臣引朕至乾清門外朕親奠畢旁立候徹祭再行告
祭禮○辛丑 上卽皇帝位於太和殿頒詔天下以明年爲雍正
元年加恩中外罪非常赦所不原者咸赦除之○諭朕惟自古賢
聖之君必有顯號徽稱以彰功德之盛垂於萬世此國家不易之
鉅典也仰惟我 皇考大行皇帝臨御六十一年早承大統寅畏

小心旦明懷昭格之忱郊祀親升中之典監於成憲率由舊章孝
奉兩宮尊養兼至展致陵廟備物盡誠總攬萬幾阜成兆
姓錫賦動盈千萬賑恤曾不稽時水旱先籌雨暘必達寬刑肆赦
德洽好生盛暑則釋囹圄嚴寒則賑饘粥兵糧豫給優賞頻頒淮
甸屢巡動數百萬之帑金運睿謨而兩河底績魯邦特幸行數
千年之殊禮屈帝尊而九拜崇師覽奏牘而利弊周知觀臣僚
而賢愚立辨保全勳舊庇蔭宗支廣育人材敦厚風俗布昭聖武
申討不庭元裔背叛而旋踵就殲三孽逆命而剋期獻馘俄羅斯
占喀爾喀之疆圉諭以威德卽奉約章喀爾喀偪厄魯特之暴殘
納其困窮胥登衽席噶爾丹肆毒鄰境三臨絕漠埽靖烽煙策晏
阿喇布坦摧滅與國出師命將恢復藏地臺灣置郡紅苗革心南
朔東西無思不服至於天縱生知日新好學講筵時御手定六經

廣博士於五賢配先儒於十哲文嬾二典書邁百家貫徹天文總括地理旁羅術數考正元聲研索羣編鑒裁纂輯凡此難名之美善洵亘古帝王首出之一人雖復累牘連章不能紀述萬一朕方與天下臣民均切怙戴不意 龍馭上賓願予沖人嗣膺大統仰承 佑啟之恩敢後顯揚之禮謹考彝章宜升 尊諡爾部詳察典禮具奏○壬寅諸王大臣等具奏請遵 大行皇帝遺詔二十七日釋服得旨 皇考大行皇帝聖德神功罕有比倫實爲亘古未有之 聖君朕亦不宜行近代相沿之典禮釋服之制以日易月雖始於漢文而高宗諒陰三年獨非古制乎朕不能上比高宗而哀慕之情不能自己且稽之史冊漢文以來誰能媲美 皇考則朕又安忍守漢文二十七日之制乎本朝舊制釋服亦待百日之期庶可稍盡思君思父之哀衷揣爾等之意惟恐過勞朕躬殊

不知朕若持服尙可少進餽粥暫眠苦塊如必強朕釋服則朕必至寢食俱廢矣朕言及此曷勝嗚咽爾諸王大臣其諒之○晉封故大學士三等公圖海爲一等公致祭一次仍以其孫馬爾賽襲○大學士等奏頒雍正年號錢文式樣得旨錢文係國家重務向因錢價昂貴常廛 皇考聖懷今何以使錢文價平方合 皇考便民利用之意從前雲南巡撫楊名時題請鼓鑄部議不准舉行滇省之外何省應令鼓鑄與錢價有益著總理事務王大臣九卿公同會議具奏尋議鼓鑄錢文應令雲南四川兩省設鑪鼓鑄從之○甲辰 上詣 大行皇帝梓宮前行初祭禮○諸王大臣等復奏國家 郊 廟祀典必待 皇上除服後舉行大禮不可久闕考据古今典禮合辭懇請遵奉 大行皇帝遺詔以二十七日釋服得旨覽諸王大臣所奏引據經書義理明晰朕惟有嗚咽悲

慟耳始知爲君之難止此持服一節乃天子第一苦衷曾不如臣庶尙能各盡其心雖勉從所請朕之哀思因茲愈切矣○諭修國維襲公奏摺蒙 皇考留中此一等公爵著隆科多承襲修國維墳塋交與該部修理加祭一次○命大將軍以下及直省督撫提鎮等差員齎摺到京者照常啟奏無得沈滯○乙巳總理王大臣等奏 大行皇帝尊諡廟號伏候 皇上親定得旨 皇考大行皇帝尊諡廟號諸王大臣等請朕親定朕思子臣尊崇君父之心何有止極然必須至允至當方孚千秋定論若少有溢美之詞不獨失天下之至公且開後人之僭越是因臣子之愚忠愚孝轉將君父盛德大業之實行涉於贊頌之虛文朕心殊不安也我 皇考大行皇帝續繼大統舊典本應稱宗但經云祖有功而宗有德我 皇考鴻猷駿烈冠古標今拓宇開疆極於無外且六十餘年

手定太平德澤恩溥萬國來王論繼統則爲守成論勳業實爲開
勗朕意宜崇 祖號方副豐功但追崇大典攸關理應僉謀共協
爾諸王大臣等會同九卿詹事科道文六品以上武四品以上詳
考舊章從公確議毋得依違毋得附和務期紀實以垂萬年○丙
午諭隆科多應稱呼舅舅嗣後啟奏處書寫舅舅隆科多○戊申
以福敏爲內閣學士原任庶吉士○己酉諸王貝勒貝子公文武大臣
官員等議奏 大行皇帝尊諡廟號議曰謹按傳云爲人君止於
仁禮運云仁者義之本順之體也得之者尊說文云在天爲元在
人爲仁故易曰元者善之長仁者德之首 大行皇帝體元立政
茂育羣生以義制事綏安兆姓史稱帝堯其仁如天惟 大行皇
帝實與竝之又按禮經云有虞氏禘黃帝而郊禘祖顓頊而宗堯
而尙書舜典云舜格於文祖釋者謂文祖堯廟也又謂格於藝祖

釋者謂藝祖堯之祖也合之祖顓頊之文則有虞氏有三祖矣宋臣陳祥道云凡配天者皆得稱祖故國語展禽有有虞氏祖高陽而郊禘之說堯所以稱文祖也顓頊至堯皆黃帝子孫而皆稱祖又周禮大宗伯禘祫追享朝享解云古者朝廟合羣祖而祭焉故禘謂之朝享以合羣祖爲不足又禘其祖之所自出故禘謂之追享夫祖之所自出始祖也而其下曰羣祖則自始祖以下皆可稱祖矣又諡義曰帝王功業隆盛引古者祖有功之義得稱祖此經書可據者臣等謂惟 聖字可以贊揚 大行皇帝之峻德惟祖號可以顯彰 大行皇帝之隆功恭擬敬上 尊諡曰 合天弘運文武睿哲恭儉寬裕孝敬誠信功德大成仁皇帝 廟號曰聖祖是日 上召諸王大臣等入諭曰諸王大臣官員俱深悉我 皇考一生神聖實行同心合詞恭上尊稱無一人異詞甚愜

朕懷朕之哀思庶可稍釋諭畢 上持鍼刺中指出血將奏內
聖祖二字圈出敬恭高捧交學士等齎出○諭內務府總管等諸
王大臣僉云朕持服二十七日後應居乾清宮朕思乾清宮乃
皇考六十餘年所御朕卽居住心竇不忍朕意欲居於月華門外
養心殿著將殿內略爲葺理務令素樸朕居養心殿內守孝二十
七月以盡朕心○庚戌諭大學士等朕惟敷政之道用人惟先闢
門籲俊之典由來尙矣然知人則哲自古爲難朕在藩邸不與朝
臣往來所以內外大小官吏皆不能悉知今荷 皇考大行皇帝
命承大統臨御之初簡用人材爾諸大臣皆久蒙 皇考知遇任
以股肱茲值 梓宮在上靈爽式憑爾等哀感交迫之時益當各
竭忠盡仰報高深內而大臣以及閒曹外而督撫以及州縣或品
行端方或操守清廉或才具敏練者爾等各據眞知灼見從公具

摺密奏古人云內舉不避親外舉不避讐爾等果矢公忠以人報國或素日同僚共事或同鄉同年或門生親戚子弟俱准保奏勿避嫌疑勿徇私援黨勿沽名市恩勿輕聽風聞勿言過其實有一於此則上負 皇考任用之恩又負朕諮詢之意矣 皇考遺命屬朕篤愛懿親保全臣下數十年來聖明之世本不容有姦貪昭著之人朕所需者人材但當有舉無劾毋得修怨陷害爾等具摺或滿字或漢字各須親寫不可假手於子弟詞但達意不在文理字畫之工拙其有不能書寫者卽行面奏至於政事中有應行應革能裨益國計民生者果能深知利弊亦著各行密奏朕自卽位以來用人行政若有闕失亦以直言毋隱朕之諄切詢問者一則急欲得人以資治理二則欲知朕行事之當否三則觀爾等所舉之人及所奏之事便可知爾等之居心制行矣○諭理藩院翁牛

特公鄂齊爾自幼跟隨我 皇考效力多年人甚謹慎朕十歲時

亦曾跟隨出獵行走著封爲貝子○以覺羅蘇庫爲禮部尙書由盛

京兵部侍郎遷敦拜爲左都御史由戶部左侍郎遷勵廷儀爲兵部左侍郎由內閣學士遷

○停止江南解送薦新秬米○辛亥以格爾布爲盛京戶部侍

郎由內閣學士遷○遣御史巡查 陵寢道路嚴禁騷擾派累

十二月壬子朔以奉移 大行皇帝梓宮告祭 上從苦次望見

陳設祭品失聲大慟諭誠親王允祉等曰 皇考明年七旬大慶

吾兄弟等方思 萬壽聖節在暢春園盡誠致敬供奉甘旨與四

海臣民共效無疆之祝豈意今年此日乃於乾清宮作如此陳設

耶復大慟不止諸王皆伏地號慟大臣近侍在左右者咸感泣不

能仰視○諭宗室及覺羅人等 皇考至仁至厚恩篤宗支凡宗

室覺羅大罪薄懲小罪寬免歷年無一人及於刑辟者必不得已

乃令圈禁朕思 皇考時問罪圈禁之人原不應釋放祇以見遇
恩赦姑予寬宥伊等當念宗室覺羅須閉戶家居安分靜守慎毋
枯過不改再罹重罪○禁止入旗官員詬罵屬下人等父母違者
交該管官懲治○癸丑諭戶部 皇考御極六十餘年澤周兆姓
凡巡幸所經小民除道清塵趨事恐後古北口一路爲我 皇考
每年行幸之地農工商賈皆得瞻仰 天顏親承膏澤朕念此路
百姓歷年殫力宜加恩恤著將宛平順義懷柔密雲平谷五縣昌
平一州雍正元年正額錢糧盡行蠲免又 陵寢一路此時正當
修道亦宜加恤著將大興三河二縣通薊遵化三州雍正元年正
項錢糧亦盡行蠲免○甲寅 大行皇帝梓宮安奉 壽皇殿自
後 上每日黎明詣 壽皇殿獻食觀德殿席地坐日晡方回苦
次○諸王大臣等合詞恭懇節哀諭朕受 皇考教誨鞠育四十

餘年今遇大事哀痛迫切實不能已朕非於此自謂盡孝也况天降緇雪林木皆白自安奉 梓宮羣鴉環繞殿庭哀鳴七夜仰觀

天意俯察物情尙且如此朕能已於沈痛乎今 梓宮奉移壽

皇殿朕未釋服之前必每日三次親詣獻食一月內每日一次親詣獻食一月外數日親詣一次如此庶可稍釋悲思若欲朕銜哀強制則朕心愈無以自解爾諸王大臣不必再奏○諭總理王大臣等從前 皇祖母孝惠章皇后大事時 皇考命貝子允禩署理內務府總管事務辦理妥協 皇考曾深嘉之今茲大事允禩經理三衙門事務井井有條其辦理 梓宮事務甚爲效力允禩著封爲郡王其總理事務之王大臣等亦克殫惻誠諸事允當除二王已經加恩外舅舅隆科多大學士馬齊俱著賞給阿達哈哈番世職○調李永紹爲盛京工部侍郎以李周望爲戶部左侍郎

黃叔琳爲內閣學士

由太常寺卿遷

○命八旗詳察孝行素著者以聞○

丁巳加上

列祖

列后尊諡○

諭總理王大臣等朕奉

皇太

后懿旨

孝懿皇后曾撫育爾躬貴妃係

孝懿皇后親妹應將

貴妃封爲皇貴妃又和妃奉事

先帝最爲謹慎應將和妃封爲

貴妃朕惟

皇太后聖心至仁至厚此

旨實爲允當爾等會同

禮部查例具奏又諭朕奉

皇太后懿旨爾兄弟之母當加意相

待朕念十二阿哥之母多年侍奉

皇考甚爲謹慎久列嬪位今

晉封爲妃十五阿哥之母十六阿哥之母嬪亦晉封爲妃再見在

有曾生兄弟之母未經受封者俱應封爲貴人六公主之母應封

爲嬪內有一常在年已七旬亦應封爲貴人○戊午諭吏部兵部

王大臣等驗看革退人員內其武職官曾在軍旅效力身經受傷

雖年齒衰邁仍留職銜文職除年老庸劣外若由進士舉人正途

出身初選知縣卽以才力不及革退亦屬可憫嗣後將此等人員或改授教職或以原品休致著會同酌議定例遵行○停止直省將軍督撫提鎮等官貢獻方物其有恭獻梓宮前食品及齋送御用藥物仍照常呈進○定下五旗補放參領各缺均勻公派親王門下參領不得過三員郡王門下參領不得過二員○庚申上釋服移居養心殿○辛酉諭總理王大臣等往年稅差官員公帑無虧而羨餘又足養贍家口兼及親族近日則不然率多虧帑獲罪歸亦無顏見其族戚公私均屬無益皇考洞鑒其故每將稅務交與地方官管理各省已居其半嗣後稅務悉交地方官監收歲額之外所有羨餘該撫奏聞起解應賞給者再行賞給爾等會同戶部工部衙門議奏○諭山東按察使黃炳著補授山東巡撫山東巡撫謝賜履操守頗好人亦謹慎但見今漕船阻凍兼有

修築河工之事謝賜履係新任之員未能諳悉著以相當之缺另行補授至於黃河衝決見在堵築未竣今冬若不乘時辦理恐至來春桃汛時愈難措置國子監祭酒齊蘇勒著補授山東按察使先赴河南會同楊宗義陳鵬年將今冬修理黃河之處商酌明白再赴按察使新任山東漕運河道事務亦著齊蘇勒會同巡撫辦理李樹德向蒙 皇考簡任山東巡撫旋改福州將軍尙未赴任今東省錢糧急宜清查著宜兆熊前赴福州署理將軍事務李樹德代宜兆熊署理都統事務清查伊任內錢糧○禮部議覆據朝鮮國王解送山東採漁人楊三等十四人被風飄至伊國審無信票又據奉天將軍咨報楊三等至鳳凰城始將信票交出復被領催雅爾泰失去應將楊三等交山東巡撫確查曾否給票雅爾泰照例治罪得旨朝鮮誠心篤敬臣服我朝歷年已久今將被風飄

至楊三等船隻送回伊等或實係風飄到彼或匪類藉端欲爲不法俱未可定嗣後飄風船隻人口驗有票文並未生事者照舊令其送回若無票文生事犯法者著朝鮮國卽照伊國法究治庶足懲匪類而戒妄行著九卿詹事科道公同會議具奏○壬戌實授高其倬雲貴總督陳鵬年河道總督德音山西巡撫馮毅廣東巡撫○諭八旗禁酗酒○封貝勒允禩爲和碩康親王十三阿哥允祥爲和碩怡親王貝子允禩爲多羅履郡王二阿哥子弘晳爲多羅理郡王○禮部遵 大行皇帝諭旨議覆歷代帝王廟原祀伏羲氏神農氏軒轅氏金天氏高陽氏高辛氏陶唐氏有虞氏夏禹王商湯王周武王漢高祖世祖唐太宗遼太祖宋太祖金太祖世宗元太祖世祖明太祖二十一位今擬增夏啟仲康少康杼槐芒泄不降局廐孔甲皋發商太甲沃丁太庚小甲雍己太戊仲丁外

壬河亶甲祖乙祖辛沃甲祖丁南庚陽甲盤庚小辛小乙武丁祖
庚祖甲廩辛庚丁太丁帝乙周成王康王昭王穆王共王懿王孝
王夷王宣王平王桓王莊王僖王惠王襄王頃王匡王定王簡王
靈王景王悼王敬王元王貞定王考王威烈王安王烈王顯王慎
覲王漢惠帝文帝景帝武帝昭帝宣帝元帝成帝哀帝明帝章帝
和帝殤帝安帝順帝沖帝桓帝靈帝昭烈帝唐高祖高宗睿宗元
宗肅宗代宗德宗順宗穆宗文宗武宗宣宗懿宗僖宗遼太宗景
宗聖宗興宗道宗宋太宗真宗仁宗英宗神宗哲宗高宗孝宗光
宗甯宗理宗度宗端宗金太宗章宗宣宗元太宗定宗憲宗成宗
武宗仁宗大定皇帝文宗甯宗明太宗仁宗宣宗英宗景皇帝憲
宗孝宗武宗世宗穆宗愍皇帝凡一百四十三位其從祀功臣原
祀黃帝臣風后力牧唐虞臣皋陶夔龍伯夷伯益商臣伊尹傳說

周臣周公旦召公奭太公望召虎方叔漢臣張良蕭何曹參陳平
周勃鄧禹馮異諸葛亮唐臣房元齡杜如晦李靖郭子儀張巡許
遠李晟宋臣曹彬韓世忠岳飛金臣幹魯粘沒喝幹离不元臣木
華黎伯顏明臣徐達劉基三十九人今擬增黃帝臣蒼頡商臣仲
虺周臣畢公高呂侯仲山甫尹吉甫漢臣劉章魏相丙吉耿弇馬
援趙雲唐臣狄仁傑宋璟姚崇李泌陸贄裴度遼臣耶律曷魯宋
臣呂蒙正李沆寇準王曾范仲淹富弼韓琦文彥博司馬光李綱
趙鼎文天祥元臣不忽木脫脫明臣常遇春李文忠楊士奇楊榮
于謙李賢劉大夏凡四十人得旨是依議速行○癸亥諭陳夢雷
原係叛附耿精忠之人 皇考寬仁免戮發往關東後東巡時以
其平日稍知學問帶回京師交誠親王處行走累年以來招搖無
忌不法甚多京師斷不可留著將陳夢雷父子發遣邊外或有陳

夢雷之門生平日在外生事者亦卽指明陳奏楊文言乃耿逆僞相一時漏網公然潛匿京師著書立說今雖已服冥刑如有子弟在京者亦卽奏明驅遣爾等毋得徇私隱蔽陳夢雷處所存古今圖書集成一書皆 皇考指示訓誨 欽定條例費數十年 聖心故能貫穿今古彙合經史天文地理皆有圖記下至山川草木百工製造海西秘法靡不備具洵爲典籍之大觀此書工猶未竣著九卿公舉一二學問淵通之人令其編輯竣事原稿內有訛錯未當者卽加潤色增刪仰副 皇考稽古博覽至意○諭九卿等自 皇考升遐以來朕心哀慕無已一應典禮俱詳考舊章務從隆備蓋不敢以天下儉其 親也但上之所行下必效之向來八旗官員於喪葬等事每多靡費今見朕備禮如是恐習以成風競尙奢侈而兵民等或至傾家蕩產殊非朕以禮教天下之意論語

云禮與其奢也甯儉喪與其易也甯戚禮記云喪具稱家之有無載在典籍灼然昭著著九卿等將滿漢官按其品級分爲等次及兵民喪葬務從簡樸毋得僭妄並將婚嫁等禮詳議定例著爲令○諭刑部恩詔內赦罪一款徒開惡人徼倖之門於政治甚無裨益因朕卽位之初諸臣援例陳請姑用允行實則此等罪人皆其自取並非治之以不應得之罪也此番援赦豁免人等俱宜詳記檔案如已赦之後仍不悛改干犯法紀務必將伊等加等治罪著詳悉曉諭○命大學士蕭永藻尙書凱音布陳元龍刑部右侍郎周道新原任侍郎穆爾泰往馬蘭峪護視陵寢以蕭永藻勤慎廉潔特加太子太傅銜○命雍正元年開鄉會恩科於四月鄉試九月會試十月殿試其癸卯甲辰鄉會試正科改於雍正二年舉行二月鄉試八月會試九月殿試○命年老大臣乘馬入紫禁城

○裁直隸惠清河監督缺令通州坐糧廳兼理○甲子 上詣
壽皇殿行月祭禮○諭部院各衙門凡出示曉諭原欲利民除弊
使人知所遵奉以昭功令也近見各衙門出示或變易舊章或恣
徇私意或作威作福或釣譽沽名往往朝夕自爲更改彼此互相
矛盾胥吏因之以作奸宄小藉端以滋擾種種弊竇不可勝舉
先帝嘗深惡之嗣後各衙門遇當禁約曉諭之事務期矢公矢慎
協情當理可以永遠奉行方准出示儻仍蹈故轍科道官卽行
參奏治罪○諭戶部自古惟正之供所以儲軍國之需當治平無
事之日必使倉庫充足斯可有備無患 皇考躬行節儉裕國愛
民六十餘年以來蠲租賜復殆無虛日休養生息之恩至矣而近
日道府州縣虧空錢糧者正復不少揆厥所由或係上司勒索或
係自己侵漁豈皆因公那用 皇考好生如天不忍卽正典刑故

伊等每恃寬容毫無畏懼恣意虧空動輒盈千累萬督撫明知其弊端相容隱及至萬難掩飾往往改侵欺爲那移勒限追捕視爲故事而全完者絕少遷延數載但存追比虛名究竟全無著落新任之人上司偏受前任交盤彼既畏大吏之勢雖有虧空不得不受又因以啟效尤之心遂藉此挾制上司不得不爲之隱諱任意侵蝕展轉相因虧空愈甚一旦地方或有急需不能支應關繫匪淺朕深悉此弊本應卽行徹底清查重加懲治但念已成積習姑從寬典除陝西省外限以三年各省督撫將所屬錢糧嚴行稽查凡有虧空無論已經參出及未經參出者三年之內務期如數補足毋得派累民間毋得藉端遮飾如限滿不完定行從重治罪三年補足之後若再有虧空者決不寬貸至於署印之官更爲緊要必須慎重簡擇蓋署印之人始而百計鑽營既而視如傳舍肆意

貪婪圖飽慾壑或取媚上官供其索取貽害小民尤非淺鮮其於前任虧空視作泛常接受交辦復轉授新任苟且因循虧空之弊終不得清嗣後如察出此等情弊必將委署之上司與署印之員一併嚴加治罪爾部可卽傳知各省督撫○諭戶工二部財者利用之源古帝足國裕民務必制節謹度朕初卽位每恐府庫金錢中飽於胥吏之侵蝕以後凡戶工二部一應奏銷錢糧米石物價工料必須詳查覈實開造清冊具奏毋得虛開浮估儻有以少作多以賤作貴數目不敷覈估不實者事覺將堂司官從重治罪○命富甯安爲武英殿大學士兼吏部尙書調隆科多爲吏部尙書以廉親王允禩爲理藩院尙書○加特古忒尙書銜仍辦理藩院侍郎事務以副都統拉錫兼署理藩院侍郎事○丙寅諭怡親王允祥等朕受 皇考深恩四十餘年未常遠離 皇考升遐無由

再瞻色笑今追想音容宛然在目御史莽鵠立精於寫像昔日隨班奏事常覲 聖顏 皇考有 御容數軸收藏內務府今 皇

考年高 聖顏微異於往時著莽鵠立敬憶 御容悉心薰沐圖

寫○諭總理王大臣等從前揀選庶吉士外諸進士俱留京學習

三年伊等若果有心學習猶可如不用心學習則留京何益嗣後

進士中學問好者著令爲教習年滿照例錄用其餘進士等俱令

回籍候缺補用○命怡親王允祥總理戶部三庫事務○以吳爾

泰爲戶部左侍郎

由內閣學士遷

○裁廣善庫衙門停止內外官員借俸

例○丁卯以石文焯爲江南安徽布政使陳安策爲江西按察使

由饒南九道遷○停止直隸等四省官員運米餉軍例○戊辰以侍郎查

克旦自軍前擅回命革職留在並帶世職自備資斧赴軍前效力

○以河南秋收稍歉命折徵漕糧免其採買○己巳命白潢爲文

華殿大學士兼兵部尚書

由兵部尚書遷

○庚午命纂修 聖祖仁皇帝

實錄○白潢懇辭大學士命諭朕嗣紹丕基夙夜祇惕惟恐負

皇考付託之重念內閣要地襄贊匪輕特命爾入閣辦事爾具摺懇辭朕素聞爾居官操守甚好巡撫江西時綏輯地方甚為裨益及任兵部尚書清勤恪慎 皇考每加優獎今朕以機務重大資爾料理爾可卽遵旨供職不必固辭兵部事務亦要緊仍著爾兼

管○以佛格三泰常保俱為內閣學士

佛格宗室三泰由太常寺卿常保由監察御史遷

○辛未先是宗人府奏親王阿哥等名上一字與 御名同應請

更定 上以名諱由 聖祖欽定不忍更改禮部宜請 皇太后

裁定至是禮部等衙門具摺啟奏得旨朕曾奏聞 皇太后諸王

阿哥名上一字著改為允字○贈故一等侍衛副都統諡果毅海

青為一品致祭一次○壬申封裕親王保泰子廣善為世子○以

張廷玉爲禮部尙書

由吏部右侍郎遷

○吏部題大學士馬齊奉旨特給

一等阿達哈哈番併前所襲一等阿思哈尼哈番又一拖沙喇哈

番授爲二等伯准其世襲從之○癸酉遣官祭長白山醫巫閭五

岳會稽山南海歷代帝王陵寢孔子闕里○乙亥賜左都御史朱

軾宅一所銀一千兩○加大學士嵩祝馬齊吏部尙書張鵬翮太

子太傅○丙子命八旗在京武職及各省駐防者俱五年一考選

軍政○以黃叔琳爲刑部右侍郎

由內閣學士遷

○楊柱綠事革職以伊

忒海爲盛京兵部侍郎

由左副都御史遷

○戊寅御史莽鵠立恭繪 聖

祖御容畢捧進於養心殿

上瞻仰依戀悲痛不勝命俟

梓宮

發引後敬謹供奉於

壽皇殿○己卯酌撤噶斯駐防兵○是歲

人丁戶口二千五百三十萬九千一百七十八又永不加賦滋生

人丁四十五萬四千三百二十田地山蕩畦地八百五十一萬九

百九十二頃十畝有奇徵銀二千九百四十七萬六千六百二十八兩有奇米豆麥四百六十六萬八千八百三十三石有奇草四百九十二萬二千八百一十束茶三十五萬九千一百五十四引行鹽五百五萬一千六百五十六引徵課銀四百四萬四千一百一十一兩有奇鑄錢四十六萬一千七百有奇

東華錄

雍正二

臣王先謙敬編

臣周澐恭校

雍正元年癸卯春正月辛巳朔頒諭旨十一道訓飭督撫提鎮以下文武各官○諭總督自古帝王疆理天下必有岳牧之臣以分猷佐治而後四方甯謐共臻上理此封疆大臣以總督爲最要也總督地控兩省權兼文武必使將吏協和軍民綏輯乃爲稱職但統轄遼遠職務殷繁較巡撫之所屬更大是在遴選屬僚之賢能者委任得宜則振綱飭紀可無廢弛之虞而以人報國亦得大臣之體特是徵清吏治必本大公之心虛懷察訪果係清節素著才具練達者任以要劇卽行保薦則舉一可以風百今或以逢迎意指爲能以沽名市譽爲賢甚至暗通賄賂私受請託不肖官吏濫

列薦章而樸素無華敦尙實治者反抑而不伸是豈風勵屬員之道乎朕視天下如一家視臣鄰如一體爾等亦宜深體此意以一家之心視兩省以一體之心視屬吏本之至公用之至當則上司之任使下僚如身之使臂臂之使指凡有才有守之人皆樂爲效用矣至於所在管轄地方有作姦犯科之豪猾倚勢剝民之搢紳理應重加懲治乃因巧於結納反得徼倖自全而家居之大臣官員皆經 皇考任用之人致政投閒安靜自好爲大吏者並不加以禮貌或反被土豪侵欺者有之亦非所以表率屬僚彰善癉惡之道也總督與巡撫將軍提督誼屬同寅凡地方軍民事務宜互相商榷各本虛公勿苟且雷同勿偏執意見方於國計民生有所裨益總督參劾州縣例由兩司道府揭報眾論僉同所以示公也近有參劾之後始行補揭夫果其當劾司道府不能揭報於前旣

有徇庇之愆而令其補揭於後又欲寬其失察之罪彼此巧飾以欺朝廷尙得謂之至公平朕觀古之純臣載在史冊者興利除弊以實心行實政實至而名亦歸之故曰名者實之華也今之居官者釣譽以爲名肥家以爲實而云名實兼收不知所謂名實者果何謂也爾督臣臈茲簡畀固宜篤矢忠誠尤當戒諭屬員痛改陋習更有任官之初頗著廉名及身躋大位則頓易其操者古人謂之巧宦其心事豈可問乎且職居制閫亦非徒以清操自善也若但謹身節用而遇地方大事一籌莫展雖免貪冒之名究鮮屏翰之實國家又何所倚毗耶爾督臣皆 皇考擢用之大臣朕嗣紹丕基一切遵循成法惟冀爾等察吏安民練兵覈餉崇實行而不事虛名秉公衷而不持偏見故諄諄告誡並兩司道府州縣各有諭旨爾等亦宜細心體察與爾屬吏共勵官箴交相儆惕朕自優

加恩禮始終保全若爾等恣意徇私不能竭忠盡職則深負皇
考簡用之恩其罪甚大國法森嚴朕雖欲寬貸爾等不可得矣○
諭巡撫國家任官守土綏輯兆民封疆之責惟撫臣爲重今之巡
撫卽古之保釐夾輔之臣也一省之事凡察吏安民轉漕裕餉皆
統攝於巡撫苟非正己率屬振飭勵精則一切刑政錢穀必致墮
墮拊循保障之功何賴乎夫吏治不清民何由安從來大法則小
廉自兩司以至郡縣平時參見接談卽可略知其才品優劣迨試
以委任訪之輿情賢否清濁自難淆濶惟上官偏私好諛屬僚善
於逢迎者卽推爲才能其樸直自好潔己愛民之員反無見知之
地及至計典黜陟並遇選擇保題之缺或先納賄賂或責報異時
始爲之薦引亦有寄耳目於監司等官聽毀譽於幕賓僚友之口
以致舉劾不公潛滋奔競勸賞黜陟旣失其當地方安得良有司

乎藩庫錢糧虧空近來或多至數十萬蓋因巡撫之費用皆取給於藩司或以柔和交好互相侵那或先鉤致藩司短長繼以威制勒索分肥入己徒供一身夤緣自奉之費罔顧朝廷帑藏財用之虛及事發難掩惟思加派補庫展轉累民負國營私莫此爲甚州縣積穀本爲備荒之計水旱歉收之歲待此拯濟於民生最爲關繫今旣視爲正供之餘項藉出陳易新之名半爲胥吏中飽半爲州縣補空一遇災荒茫無賑貸皆由巡撫平時疏略包容玩愒所致也屬員缺出委署雖由兩司詳請其實巡撫操其權下屬鑽營屬託以缺之美惡定酬賂之重輕攝篆之人久則年餘近亦數月往往視爲傳舍情同行劫不恤小民之脂膏但飽谿壑於無厭務償得署之餽遺而止試思此一年數月之閒窮黎何罪而可縱貪暴以剝削之乎此等積弊尤爲國法所不容者巡撫參劾知府應

由司道揭報參劾知縣應由道府揭報所以示公慎無私之義也
近有先行參劾而令其補揭若所劾不公則其補揭未免以勢陵
之使不得不從果其當劾則司道府旣不能公揭於前而復巧飾
於後以寬其徇庇失察之咎上下容隱視功令爲具文公慎無私
之謂何撫標兵丁多者二千餘名少亦千餘名境內設有匪類竊
發藉以捍禦接捕今撫臣自謂無行軍進剿之職置標兵強弱於
度外不加訓練器械朽鈍營伍廢弛裁汰老弱之兵空糧悉歸私
囊大非國家設兵衛民之意矣雲貴川廣獠獍雜處其奉公輸賦
之士司皆當與內地人民一體休養俾得遂生樂業乃不虛朕懷
保柔遠之心嗣後毋得生事擾累致令峒氓失所至於土豪巨猾
結交官吏武斷鄉曲逞奸干犯之徒每或彌縫漏網而告休歸田
之大臣官員安分杜門反徇私吹索藉端陵踐此皆大失好惡之

公尤損保全耆舊之義非鎮撫者所當留意乎爾諸臣皆荷 皇
考任用之恩受全省撫綏之寄朕繼承大統祇遵成憲優禮大臣
保全終始惟冀爾等各抒忠悃安靖封疆朕所諭者有則悔悟速
改無則省躬加勉兩司道府州縣各有諭旨爾亦詳細體察與諸
屬吏共相勉勸同心協力以盡職守若不念 皇考簡畀之隆致
貽地方黎庶之害負恩曠職自取罪戾朕又安能廢法以宥爾乎
○諭督學朕惟自古帝王皆以興賢育才爲務我國朝自 太祖
太宗肇造鴻圖 世祖定鼎中夏首隆學校加意人材開國規
模超越前古至我 皇考聖祖仁皇帝御極六十一年培養教育
怙冒涵濡深仁厚澤有加無已 御製訓飭士子文頒布學宮東
西南朔海溼山陬戶習詩書家敦禮樂遐邇無不嚮風文教之隆
莫過於此矣朕繼承大統遵守舊章寤寐求賢惟恐或失念學校

爲士子進身之階督學一官尤人倫風化所繫遴選各省學臣倍加鄭重爾等須廉潔持身精勤集事實行文風兩者所當並重若徒事文華而不敦崇實行猶未爲盡職也表揚忠孝節義崇祀先聖先賢訪求山林隱逸搜羅名蹟藏書而衡文一道專以理明學正典雅醇潔爲主古人云言乃心聲氣由風養必士品端而後文風正他日爲國家柱石爲朝廟羽儀不綦重歟勿私納苞苴勿瞻徇情面勿輕視武途勿濫取祠蔭勿矯激沽名勿昏庸廢事勿卑污貶節勿驕暴陵人胥吏必謹關防幕客尤宜選擇如此則內外交懋本末兼修上不負朝廷下不愧多士朕耳目所及必有見聞若罔顧聲名廉隅不飭國有常憲罰必隨之尙其勉旃毋忽○諭提督國家武功赫濯綏靖區夏用資專閫統率全省將士俾黎庶誠和疆圉甯謐提督之任綦重矣當茲海宇承平士卒狃於晏安

不以兵革爲事相沿日久營伍漸弛非所以肅軍政飭戎行也爾等皆係 皇考簡用節鉞之大臣尤宜恪遵令典倡率所屬將弁簡閱卒伍整器械操演技勇平時討論軍實訓練精勤乃稱節制之師折衝禦侮庶幾有備無患矣夫儲糧裕餉所以足兵食壯干城非爲飽一人之私橐也乃虛名冒餉侵漁扣剋視爲故常以致朝廷恤兵養士之典止供將吏肥家之計居心多愆自難彈壓下僚馭眾寡恩何以振興士氣提臣職任拊循果能廉正自持無虛給餉俾士飽馬騰有不感激思奮者乎至山海要區得人最重爾身爲大帥凡將佐偏裨果其智勇素著才技優長肅紀律而輯兵民歷有成績之員或軍政薦舉或破格題請皆當予以優擢如本係庸劣之弁徇情面受賄賂始則權宜委任旋復列名保奏不特冒干名器必致貽誤地方濫用匪人之咎其能逃於功令乎且

設兵所以衛民文武官屬殊途而轄兵愛民均有責焉如各執己見不相和協勢必有縱兵虐民挾制長吏以逞威作奸者在文臣豈容辭咎而提臣統領水陸重師管轄不嚴調劑不力致文武抗衡兵民異視責更難追書曰同寅協恭和衷哉爾當一秉虛公和衷辦事嚴飭將弁於所屬汎地實心捍衛勤緝奸宄俾居民安堵無虞地方咸受其利益爾等皆勤勞素著效力年久之人 皇考屢加拔擢洊膺斯任朕祇遵成憲優遇大臣保全終始爾等其各抒忠悃以無負朕愛養兵民之至意其總兵副將參遊等官各有諭旨爾亦應詳細體察同心協力共相策勵靖共爾位永奠封疆

○諭總兵官國家幅員廣大凡嚴疆重鎮關塞要害之地設總兵俾之鎮守上承督臣之節制下樹將弁之表率輯兵安民厥任綦重居是官者當以甯謐地方爲念嚴飭官兵巡緝奸宄儻有匪類

務必窮盡根株使宵小無從潛匿良民得以甯居若平時漫無覺察日久必致蔓延綢繆未雨之謂何武臣雖不干民事然保障捍衛責有攸歸守此方卽當軫念此方之民毋得視之膜外縱兵肆擾至文武職任雖分盡心王事則一彼此和衷同心共濟自不至貽誤公事况揆文振武經術同源善於恤兵必善於愛民尙何至縱兵虐民失國家設兵衛民之意乎總兵統轄營汛甚多當以訓練爲先嫻騎射整隊伍備器械限期校閱勤惰嚴分賞罰明而軍政肅隱然一長城矣所屬將弁兵丁智勇超羣則立登薦剡武藝精熟則特拔戎行以之鼓勵軍士猶有古良將風焉兵之所需糧餉最重給糧而扣剋則師旅有枵腹之憂缺兵而不補則營伍有空虛之患總兵率先潔己嚴飭偏裨毋得久懸兵缺以恣侵漁毋得剋減額糧以肥囊橐則兵籍無虛士氣自奮有不收臂指之效

者乎至於馭兵之道務在寬嚴得中過寬則兵以怠玩而生驕過嚴則兵以拘迫而滋怨能於嚴明之中隱寓愛恤之意庶幾上下一心忠義自奮此又在爾鎮臣之善爲運用也仰惟 皇考垂誠提鎮諸臣有曰韜鈴宜裕紀律宜明拊循宜至訓練宜精又曰文武輯睦毋相抗衡軍民調劑各得其平煌煌 天語勒於箴規久矣爾等皆係 皇考簡畀之人果能實心力行不致始勤終惰上負 聖訓朕心嘉乃成績必懋錫殊典如其徒擁厚祿虛糜爾位既無益於兵民致有乖於令典國法森嚴朕不爾貸也○諭布政司朕惟國家官制分省開藩爾職居方伯任寄旬宣所以綏輯羣黎布昭德意實庶邦之喉舌列服之綱維任既重矣責亦大矣府州縣官之賢不肖最關民生休戚當不時察覈治行務知其實分別臧否以告督撫爾以無私自信督撫自不以私心自疑協和盡

力以勸賢懲不肖則除害興利一方安矣今計典之黜陟特疏之
薦彈朝廷憑督撫之奏章督撫憑布按之詳揭爾布政爲官吏表
式自當益矢公忠若愛憎任情是非倒置以諂事上官通行請託
爲賢不善逢迎恥投暮夜爲不肖其何以稱之屏之翰百辟爲憲
者哉夫官至監司數厯有年當服官之初廉潔自守漸登高位頓
改初心更有矯飾虛聲潛納賄賂陋俗相沿謂之名實兼收其罔
上行私爲尤甚孔子謂事君勿欺甯不聞乎賦役會計皆爾專司
調劑均平乃爲稱職今錢糧火耗日漸加增重者每兩加至四五
錢民脂民膏剝何堪至州縣差徭巧立名色恣其苛派竭小民
衣食之資供官司奴隸之用爾試思戶版稅籍誰爲職掌私派橫
徵誰任其咎顧可失於覺察乎各省庫項虧空動盈千萬是優是
那總無完補耗蠹公帑視爲泛常尤爲不法宜嚴革前弊永杜侵

那如司庫盤查之責在巡撫虧空之根亦由巡撫巡撫借支而布政不應者少矣然職在監司果能廉正自持則巡撫挾勢借支斷不能行但謹身節用量入爲出司庫必無虧空矣州縣庫盤查之責在知府覺察虛實之責獨在布政爾但潔已率屬不容徇庇州縣庫必不虧空矣朕深悉弊源所以反復醇切言之冀爾等悔且改也 皇考德洽區宇六十餘年朕嗣守丕基惟成法是式爾等皆蒙 皇考簡授職任藩宣果能各效忠誠懷遵功令朕自始終保全加以擢用若營私黷貨曠職累民爾旣負 皇考之深恩朕又安能弛國家之令典三尺莫遁爾其慎之○諭按察司朕惟直省大小訟獄民命所關國家各設按察司以專掌之一切州縣申詳至爾司而獄成凡督撫達部題奏事件皆由爾司定案任豈不重歟 皇考仁覆如天每覽西曹奏牘反復推詳惟寬惟慎逮情

實罪當猶施緩決之恩好生之德洽於民心六十餘年於茲朕嗣
守大訓思四海之內有匹夫匹婦罰非其辜者卽非所以繼 皇
考之志夙夜凜凜焉何道而能不濫不冤惟爾司是賴朕惟國家
考定律例所以弼教非以厲民是故嚴立刑書防其或罹於法及
至斷獄又條分縷析思以曲全其生書曰欽哉欽哉惟刑之恤哉
又曰與其殺不辜甯失不經此律例之本意也今或情例相違牽
合文法以納民於網或有兩例並見輒上下其手以自遂其私安
得無冤獄哉 太祖高皇帝之訓曰生殺之際不可不慎聽斷之
官必期得情大哉 聖言包舉虞書周禮之義夫折獄憑口供而
平反憑案卷今法吏不求得情惟求完結州縣案卷之申詳爾司
者多鍛鍊口供附於律例冀免爾司之駁查爾司之詳督撫督撫
之揭部院者又加文致焉冀免三法司之駁查漢路溫舒所云奏

當旣成雖皋陶視之猶以爲死有餘辜者也口供案卷如是冤抑何從平反咎在聽斷之初心原非欲必得其情也今宜釐剔宿弊歸於明允毋得因循故事自墮奸欺也大計黜陟由爾司詳報督撫宜以用刑明慎執法不阿者爲賢能毋以善事督撫弗逆爾意者爲賢能也地方豪猾若苗有莠不除不翦害我嘉生至於良善巨室致政大臣猾吏或藉端侵抑之非所以稱朕意也邇來士大夫好云名實兼收所謂名者官爵也所謂實者貨財也習俗媮薄朕甚憫焉夫大廉之義百司攸同至納賄出入人罪於法尤重戕人之命破人之家以潤屋奉身厯觀古來逃於國法者十無一二免於罰者更百無一二哲之呂刑曰獄貨非寶非聽訟者之明訓歟爾司其正己率下使法無枉撓庶幾刑措之風尙其助諸○諭道員爾等官厯監司所以贊襄藩臬承流宣化者也分守分巡職

居協理糧河鹽驛各有專司身居是官必顧名思義名者實之華也克副其實而後名歸焉如守巡兩道首先潔已惠民凡府州縣之廉潔貪污俱宜細加察訪不時密詳督撫以憑舉劾地方有土豪武斷尤宜禁戢翦除衛良除莠乃稱其實若但知趨承大吏或止圖下屬陋規一切吏治民生槩置不問貪庸陋劣殊負朝廷設官之意矣糧道專理漕運職任非輕使徒知起運規例扣剋運費苦累運丁營私煩擾有玷官箴貽害百姓何所底止河道有董率工程之責凡分修河員孰賢孰否俱應洞悉並宜親身經歷查勘估計某口險峻某口平易某處隄工堅固某處冒支帑金儻不計虛實不辨勤惰僅以納賄多者爲能員餽送少者爲拙吏而於工程漠不經意一遇坍塌誰之咎耶鹽道一員尤關國課邇年鹽法弊竇叢生正項錢糧每多虧欠一由上下各官需索商人巧立名

色誅求無已窮商力竭不得不那新補舊上虧國課高控鹽價下累小民至於官鹽騰貴貧民販賣私鹽捕役鬪毆株連人命流弊無窮一由商人用度奢靡相仍陋俗不知節儉致欠額徵爾等運籌鹽法宜將陋例積習盡情禁革必思何以甦商何以裕課上供軍國下利閭閻方爲稱職驛道爲驛站錢糧所繫必廉節自守乃克剔弊釐奸凡驛遞馬匹數目多寡每有假冒開銷歲修船隻亦有虛浮不實該員一貪貨貨勢必昏庸或過於苛覈勒索多方經管屬吏疲不能支總之病官病民悉緣貪黷敬爾在官垂諸古訓靖共爾位載在風詩爾等各有常職各守官方名實二字極宜體認今以獻賂爲實虛譽爲名動云名實兼收內以欺己外以負國有覲面目其何以立身而抒忠盡乎 皇考御極六十餘年以軫恤民生爲首務各省道員必親加遴擢諄諄戒勉極其詳慎朕積

承大統翼翼小心惟仰體 皇考愛護元元之至意亦期爾等爭
自濯磨振飭風憲以副朕望果能肅清綱紀無致廢弛當破格獎
勵其或因循不改朕必置之重法○諭副將參將遊擊等官朕惟
國家兵制凡疆宇要地既設提督總兵統率鎮守又設副將參遊
分別營伍遞相鈐轄蓋從古治兵有大帥必有偏裨所以宣揚威
武協贊軍機收指臂之效奠磐石之安也爾等所屬地形有險易
兵數有多寡各宜豫定練兵之法親校騎射嚴試技勇簡拔驍銳
更換老弱務令一營士卒人材雄健武藝精嫻又時教以行陣使
之步伐進退井然有法日演月習氣壯心齊自成有制之師而無
難折衝禦侮矣乃有不肖將弁不勤訓練按籍徒有虛名責效毫
無實濟營伍廢弛爲害最大究其弊由於將弁之貪利而廢法一
在冒虛糧而兵無實數一在剋月糧而兵有怨心上虧天家之糧

餉下股窘卒之脂膏身司戎務而不能廉正以服眾雖日示訓練之法誰爲之踊躍用命乎爾等遇有兵丁空缺卽選力勇技精者補足隊伍至於馬步各糧按期領給不得剋減分毫古之良將多以愛恤士卒克建膚功投醪挾纊之風爾等宜知嚮慕焉官軍之協守一方所以捍衛一方之百姓故曰設兵以衛民也防亂於未萌緝奸於已發俾居民安家樂業共享昇平自然受兵之利而不受兵之害儻或約束不嚴縱兵肆虐誘賭放債恃强奪利甚至地方小警不防禦緝捕以致奸宄滋蔓徒卸責於有司文武失和秦越相視殊背國家設兵鎮守之意律法具在罪有攸歸至於爾等簡用督撫中軍責任匪輕尤宜潔已奉公恪遵法紀至都司守備千總把總等員各有城守汛防之責亦宜努力稱職自奮功名朕念爾等曾受 皇考選擢之恩自應保守前勞力圖後效果能整

飭戎伍允著干城之望朕自不惜寵以崇階儻若廢墮武備侵漁
糗芻甚且妄執武官不惜死之言恣意逞威虐民生事爲害於地
方王法森嚴決難輕貸○諭知府國家親民之官莫先於守令蓋
州縣官與民最親而知府又與州縣官最親凡州縣興利除弊之
事皆於知府有專責焉是知府一官分寄督撫監司之耳目而爲
州牧縣令之表率承流於上宣化於下所繫綦重矣漢宣帝有曰
太守吏民之本也又曰庶民所以安其田里而無歎息愁恨之心
者政平訟理也與我共此者其惟良二千石乎故兩漢循良稱盛
而賢守尤多龔黃召杜諸人大都皆廉潔和平正身率屬以爲民
休養生息史稱其所居民富所去民思此皆彰明較著者也 皇
考激肅官方慎簡僚吏知府中有政績茂異聲名著聞者必加優
眷數年之間卽膺殊擢所以鼓勵循良務令羣黎受福爾等蒙

皇考簡用之恩受國家民社之寄地方不甚遼遠則於民間之疾苦可以周知勢分不甚懸殊則於屬下之賢否可以洞悉爾果廉潔自持屏絕賄賂則督撫監司必不至肆行需索而州牧縣令亦不敢恣意貪婪近聞州縣火耗任意加增罔知顧忌以小民之脂膏飽貪吏之谿壑由爾不能卻遺金於暮夜又安能禁屬吏之濫徵乎盤查倉庫必須覈實不可視爲故事乃或藉盤查之名勒索餽遺是因盤查而虧空愈甚矣爾能時勤勸誡加以體恤則州縣可無虧空之虞能制節謹度淡薄是安則爾亦可免虧空之累勸課農桑以厚風俗禁緝強暴以安善良平情聽斷以清獄訟皆爾職守之所當盡者至於督撫舉劾州縣必由爾之詳揭務須秉公持正勿涉偏私若善於逢迎者從而護庇薦拔之而端方恬靜之人反故爲摧抑下吏皆苟且營私以求容悅地方之事尙可問乎

居官者每有初入仕途清操自矢漸登華要頓改初心既知砥礪廉隅卽當始終一節更有巧於仕宦者人每謂其名實兼收朕最不解此語夫名者實之華果能廉潔愛民奉公盡職此所謂實也治行稱首民歌輿誦此所謂名也實至而名隨之如本立而華茂焉若以弋取虛譽爲名而以封殖多藏爲實此則小人之尤更甚於貪黷彰聞之輩矣朕繼承大統夙夜祇懼惟恐有負 皇考付託之重深冀爾等各體此意精白乃心以古循良自勉若徇私納賄不能率屬愛民貽害地方蔑視憲典三尺具在朕不能爲爾等寬也○諭知州知縣朕惟國家首重吏治爾州縣令乃親民之官吏治之始基也貢賦獄訟爾實司之品秩雖卑職任綦重州縣官賢則民先受其利州縣官不肖則民先受其害膺茲任者當體朝廷惠養元元之意以愛民爲先務周察部屋綏輯鄉里治行果有

其實循卓自有其名非內聚賄而外干譽謂之名實兼收也全省吏治如作室然督撫其棟梁也司道其垣墉也州縣其基址也書云民惟邦本本固邦甯夫所以固邦本者在吏治而吏治之本在州縣苟州縣之品行不端猶基不立則室不固庸有濟乎 皇考臨御六十一年灼知州縣之重特行引見諮詢明試至詳至慎其有廉能之員每不次超擢以示鼓勵今海內羣黎皆 皇考所懷保也朕膺 宗社重寄思繼 皇考之治功惟爾州縣諸臣具有父母斯民之責其爲朕立之基址以固邦本焉誠能潔己奉公實心盡職一州一縣之中興仁興讓教孝教忠物阜民安刑清訟簡朕將升之朝宇用作股肱如或罔念民瘼恣意貪婪或朘削肥家或濫刑逞虐或藉刻以爲清或恃才而多事或諂媚上司以貪位或任縱胥吏以擾民或徇私逞欲以上虧國帑王章具在豈爾貸

欺更有任州縣時私肥己橐而漫云且俟顯要方立名節者其與
初市清名晚而改操之人何以異哉至於錢糧關係尤重絲毫顆
粒皆百姓之脂膏增一分則民受一分之累減一分則民沾一分
之澤前有請暫加火耗抵補虧空帑項者 皇考示諭在廷不允
其請爾諸臣共聞之矣今州縣火耗任意加增視爲成例民何以
堪乎嗣後斷宜禁止或被上司察覈或被科道糾參必從重治罪
決不寬貸夫欲清虧空之源莫如節儉正直節儉則用無不足正
直則上司不可干以私若朘小民之生以飽上官之貪欲曰不測
之罪以快一時之奢侈豈砥礪廉隅爲民父母之道乎爾州縣等
官其各恪共乃職勿貽罪戾毋謂地遠官卑朕不及察其賢否也
○壬午諭戶部恩賜老人原爲崇年尙齒而地方賞老人者每州
縣動支數千金司府牧令上下通同侵扣吏役復任意需索老人

十不得一上負曠典罪不容追今飭令督撫嚴查務令有司親自
沿鄉訪察據實造冊給發不許絲毫侵扣儻仍蹈前弊立即參處
如督撫奉行不謹朕若訪出必加以失察之罪再老人九十以上
者州縣不時存問其或鰥寡無子及子孫貧不能養贍者督撫以
至州縣公同設法恤養或奏聞動用錢糧務令得霑實惠○癸未
河南河隄合龍嚴諭河南巡撫楊宗義加謹防守○甲申召趙宏
運來京以蔡起俊爲湖北按察使由雲南廣南知府遷○丙戌諭原任大學
士阿蘭泰王熙李光地尙書趙申喬等俱係 皇考時宣力效忠
之人作何追卹加恩之處總理事務王大臣會同白潢張鵬翮朱
軾議奏尋議阿蘭泰王熙加祭一次李光地贈太子太傅趙申喬
贈太子太保從之○上召來京叩謁 梓宮科爾沁達爾漢親王
和碩額駙羅卜藏滾布等入養心殿諭曰爾等先世俱在 太祖

時歸誠效順竭力同心誼若一家懋著勤績皆深沐 皇考加恩
愛養之人今聞 皇考升遐叩謁 梓宮哀號擗踊朕心深爲憫
惻仰維 皇考視爾等如子孫於茲六十餘年恩隆情篤今 龍
馭上賓屬大位於朕躬朕仰承 皇考付託之重當視爾等如一
家深加愛養爾等宜感念 皇考深恩和衷共勵竭誠效力爾等
眾扎薩克俱有辦理旗務統轄眾庶之責凡事秉公矢慎各撫恤
屬下人等慎勿擾累○辛卯莊親王博果鐸薨○壬辰諭總理王
大臣議政大臣等青海台吉策零董洛卜著封爲貝勒自西陲用
兵以來青海之王以下台吉以上各著勞績 皇考曾降旨俟凱
旋之日再行計功今青海王台吉等歷年功績作何加封施恩之
處察明議敘具奏○追封輔國將軍巴爾堪爲輔國公諡武襄以
其子巴賽襲○陳鵬年以病劇奏以齊蘇勒署河道總督佟吉圖

署山東按察使

由御史署

○癸巳召王企靖來京以裴率度爲江西巡

撫

由貴州布政使遷

○召張連登來京以納齊喀爲湖北巡撫森圖爲山

西布政使高成齡爲山西按察使

由江西瑞州府遷

○甲午諭內閣各省

奏銷錢糧除地方正項及軍需外其餘奏銷項內積弊甚大若無部費雖冊檔分明亦以本內數字互異或因銀數幾兩不符往來駁詰一有部費卽糜費錢糧百萬亦准奏銷或將無關緊要之處駁回以存駁詰之名掩飾耳目咨覆到日旋即議准內外通同欺盜虛冒此等情弊盡在皇考睿照之中聖恩寬大未行深究朕今不得不加整理嗣後一應錢糧奏銷事務無論何部俱著怡親王隆科多大學士白潢左都御史朱軾會同辦理或將各部賢能司員指名保題或酌量另取官員令伊等管辦之處著王大臣四人議奏尋議錢糧關繫甚重應另立衙門設滿漢郎中員外郎

主事各二筆帖式十遴選賢能補用至錢糧除正項之外其軍需各省動用之項具題到日應准應駁臣等會同該部查覈議覆設立署名恭候 欽定得旨署名著爲會考府餘依議○乙未諭九卿朕受 皇考付託之重撫育羣黎夙夜孜孜惟恐聞闕失所昨山東巡撫黃炳奏稱東兗二屬上年二麥失收小民未免困苦直隸河南鄰境之民有攜家覓食者朕卽飭直隸河南巡撫加意撫綏招集復業但兩省巡撫並未奏聞朕恐其視爲泛常奉行不力爾等可會同確議或特遣大臣或交與該撫作何賑濟之法務使窮黎得沾實惠又前歲河南黃水潰決汎溢於直隸地方比年以來兩省近水居民耕種無資衣食匱乏均應加恩撫恤爾等一併議奏尋議直隸河南流民應各派大臣一員會同該撫動常平倉穀賑濟其無力耕種者酌量賞給不能回籍者應令直隸河南山

常鼎身故眾商遂改前供所審未爲允協朕聞常鼎居官本無令
名 皇考亦曾向朕言之其所奏豈可爲準 皇考當日不肯據

常鼎所奏定案故遣大臣前往察審今旣已審明不必再行駁詰
况張應詔本無科派之事眾商安得不改前供乎至於商人欲以
此項銀兩充餉朕豈需此其已交十三萬餘兩准其抵算往年商
欠其未完銀二十餘萬兩盡行豁免我 皇考恤商愛民若辦此

事亦必如此歸結也至於眾商厯年所欠正項關繫國帑著該部
悉心確議定限徵收○丙申 上臨莊親王博果鐸喪○諭吏部
八旗滿洲翰林向無升轉之途甚爲可憫伊等如何升轉之處著

議奏尋議嗣後翰林院滿洲侍讀侍講諭德洗馬國子監司業缺出將各部俸滿應升之人補授一員翰林院編修檢討補授一員分缺補用從之○命八旗舉人生員內有在護軍執事人行走者俱退回生員仍給銀二兩舉人仍給銀三兩令伊等讀書○先是理藩院奏澤卜尊丹巴胡土克圖原係法教內之第一人數世行善垂九十年當噶爾丹叛亂時身率七旗之喀爾喀等來歸最爲有功伊係喀爾喀汗之子土謝圖汗之弟遭逢 聖朝疊蒙殊遇前年 聖朝仁皇帝面諭之曰癸卯年朕壽七十爾壽九十大慶之年爾必前來斷勿食言胡土克圖領旨而回今雖年邁衰病遵諭來京謁見 梓宮志願已遂泊然示寂請照達賴喇嘛班禪額爾德尼之例給賜名號印冊以示優典得旨俞允命給與名號印冊旣而喀爾喀土謝圖汗等以停止往弔胡土克圖奏謝諭胡

土克圖極蒙 皇考聖祖軫念禮遇加隆 皇考聖祖升遐係甲

午日今胡土克圖圓寂亦係甲午日佛果 聖因證明不昧胡土

克圖非尋常僧人比朕躬親往懸帕供茶以盡朕心將此旨傳與

喀爾喀汗王額駙及胡土克圖徒屬人等知之至是理藩院以移

送澤卜尊丹巴胡土克圖龕座請派大臣官員護送前往 上特

命敦郡王允祿世子弘晟齎賜印冊奠儀又命散秩大臣尙崇廩

等護送胡土克圖龕座前行所過蒙古地方勿得任意需索○戊

戌諭總理王大臣等刑部事繁阿錫鼐停其兼理倉場事務著回

部辦事李英貴補授滿洲倉場侍郎陳守創以府尹帶管倉場事

務○庚子諭吏部開列各省試官在部院之舉人進士出身者不

比翰林人員文章或致荒疏若將此等人差往不能閱文殊屬無

益伊等如有自稱文章未經荒疏者著開列朕加考試○辛丑以

王之樞爲吏部右侍郎魏廷珍爲湖南巡撫查嗣庭爲內閣學士

由翰林院侍講學士遷

○壬寅總理王大臣議奏宋明之禮 梓宮至山陵

嗣帝皆不親送宋時以親王宰相充之明時或以皇子親王主之所 皇上思宋明定制之深意念 宗廟 社稷之重任以慰臣

民之心得旨凡事當遵奉 皇考已行典禮方爲盡善前 曾祖

母太皇太后發引時 皇考親自恭送至 祖母皇太后發引時

皇考聖躬違和兼有足疾尙且 親送 梓宮啟行諸王大臣

豈能勸止乎親送 皇考梓宮至 山陵朕意已定大臣等勿再

強奏○諭提鎮副將俱係 聖祖仁皇帝簡用之員故將遺存弓

矢纛韃等物各行給賞伊等應作何敬謹迎接供奉俾 聖祖仁

皇帝恩澤遠及子孫累世永戴之處爾等會同兵部議奏尋議所

賞物件應令伊等於子弟內選擇謹慎之人赴部祇領子孫永遠

供奉從之○以登德爲工部左侍郎尹泰爲內閣學士辦工部侍

郎事

原任祭酒

○降刑部尙書陶賴四級調用張廷樞五級調用侍郎

王景曾二級留任以審擬陳夢雷一案徇縱故也○癸卯楊宗義

丁憂以牟欽元署河南巡撫

由布政使兼署

○以巴泰爲左副都御史

由翰

林院侍講學士遷

○吏部議覆新進士除庶吉士外揀學問好者令爲內

外官學教習年滿遇月官扣缺補用餘回籍候選從之○甲辰封

涪郡王允祐子弘曙爲長子貝子允禔子弘春爲貝子○乙巳總

理王大臣禮部九卿遵旨議奏臣等謹考典章恭上 仁壽皇太

后尊號伏承 懿旨以

聖祖仁皇帝梓宮奉移

山陵之事未

畢屢辭不允臣等眾籲懇求始荷允行今恭上 冊 寶典禮

皇太后仍欲遲遲仰見

聖德謙光追念

先皇誠敬哀慕之心

至真至切從古未有臣等竊思尊上

崇稱聖王之盛軌恪遵

慈諭大孝之至情况值 聖祖仁皇帝梓宮奉移 山陵在邇

謹俟事畢之後恭上 皇太后 冊 寶典禮吉期交與欽天監

選擇舉行得旨是○以胡煦爲內閣學士

由鴻臚寺卿遷

劉師恕爲貴州

布政使

由祭酒遷

○大學士王揆以老病乞休允之○朝鮮國王李昀

奏謝敕封弟李吟爲世弟恩並報該國議政金昌集中樞李頤命

左議政李健命判中樞趙泰來等謀逆伏誅顛末報聞○丙午策

妄阿拉布坦使臣垂納木喀等朝見 上命都統拉錫等傳諭曰

爾國台吉在我 聖祖時雖有微勞亦多罪戾乃無故侵我哈密

發兵往招地殺害拉藏毀壞佛教惟天子統御萬邦理宜興師問

罪我 聖祖皇考至仁如天但令陳兵邊境俟其深悔前非卽加

恩寬宥並無意於殄滅爾國也其後澤卜尊丹巴胡土克圖爲策

妄阿喇布坦再三求赦我 聖祖皇考追念舊日微勞又曲鑒胡

土克圖老人懇款之意允其所奏令遣使往諭待其伏罪自陳卽降 恩旨令 聖祖皇考升遐朕繼承大寶胡土克圖老人遠來再爲奏請是以復遣使於爾若爾台吉卽遣親信之人誠懇陳辭朕卽寬宥以甯爾土宇若冥頑不靈仍搆兵端亦可明言其意如欲廣我 聖祖皇考之仁恩惟爾台吉欲振我 聖祖皇考之武烈亦惟爾台吉朕仰承丕緒行我軍威爾台吉詎不稔知今胡土克圖大喇嘛又已圓寂從此亦無有爲爾台吉奏請者矣可作速定奪來奏若仍前枝梧則兵由爾起無與於朕也爾非專使故不與爾敕書爾其謹識朕言一一往諭○己酉以李紱署吏部右侍郎原任左副都御史○禁侍衛官員等私在諸王門下行走○庚戌諭黃炳東竟兩屬去歲二麥失收直隸河南鄰境之民亦有攜家覓食者朕覽奏惻然爾奏欲各捐己貲以爲賑濟爾等貲從何出勢必

仍取之於民是賑民實以累民也不如動用倉儲遴員分路賑濟
小民庶得均霑實惠至鄰省流移之民亦宜一體撫恤毋令失所
又諭運道淺阻舊例撥派民夫挑淺濟運朕思東省連年薄收百
姓未必堪此重役古人救荒之策有大興役以濟民食者不若竟
動正項錢糧雇夫挑漕應雇既多散者復聚民資工食稍延殘喘
民心鼓舞工程易就運道早通於興役之中卽寓賑濟之意已有
旨命修吉圖署理按察使赴河南與齊蘇勒商定料理運道俟其
到日爾與公同料理

二月辛亥朔以宗室佛格勵廷儀俱爲刑部尙書

佛格由內閣學士勵廷儀由兵

部左侍郎遷

吳士玉爲內閣學士

由翰林院侍讀學士遷

○壬子諭各路將軍揀

留精卒其老病者撤之○命張鵬翮爲文華殿大學士兼吏部尙

書

由吏部尙書遷

○癸丑追封

皇太后曾祖額布根祖一等阿思哈尼

東華錄

雍正二

九

哈番兼佐領額參父護軍參領衛武俱爲一等公世襲以衛武子

白啟襲○巴濟納休致以關色爲盛京禮部侍郎

由副都統遷

○甲寅

諭禮部朕奉

皇太后懿旨嫡妃那拉氏懿範性成徽音素著孝

敬惠慈宜承光宸極顯號中宮應立爲皇后以宣壹教朕祇遵

慈訓立妃爲皇后應行典禮爾部詳察具奏○乙卯諭禮部陳鵬

年潔己奉公實心爲國因河工決口自請前往堵築寢食俱廢風

雨不辭積勞成疾歿於公所聞其家有八旬老母著該撫賜司庫

銀二千兩資其養贍伊母給以封典並予陳鵬年諡照一品廕其

子○宗人府題莊親王博果鐸薨逝無嗣所襲乃承澤王碩塞之

爵承澤王係 太宗皇帝之子 世祖皇帝親兄與 皇上甚近

理應 聖祖皇帝之子承襲得旨宗人府奏請莊親王之王爵於

朕諸弟內著一人承襲朕奏請於 皇太后奉 懿旨令十六阿

哥允祿承襲允祿著襲封莊親王其惠郡王博翁果諾之孫球琳著封爲多羅貝勒將惠郡王原有佐領屬下人等俱著給與○命甄別翰林詹事官不安本分者勒令解退回籍○戊午諭總理王大臣等趙之垣將虧空錢糧知縣連參二員從前 皇考令趙之垣署理直隸巡撫事務專爲清理伊叔趙宏燮錢糧也而伊視爲與己無干但將屬下知縣遽行參奏定例督參事件交巡撫審理撫參交總督審理直隸旣無總督著將趙之垣所參虧空錢糧之知縣二員交與刑部確審他省若有此等奏參虧空內有別情者亦將一二案提交刑部審訊○諭吏部直省教官專司訓迪士子今捐納教職人員有不諳文藝之人不可爲年長學優者師應照伊所捐品級別任補用該部議奏尋議各省教職俱以舉人恩拔副榜廩生挨貢補用其捐納人員教諭改以縣丞用訓導改以主

簿用從之○以嵇曾筠署河南巡撫給路費銀一千兩

由左僉都御史遷

○己未封朱軾母一品夫人並給銀二千兩○降級留任吏部左侍郎李旭升以老病乞休給還原品加尙書銜致仕○庚申諭總理王大臣及諸王大臣等外閒匪類捏造流言妄生議論謂朕鍾愛十六阿哥令其承襲莊親王王爵承受其家產朕爲君上多封諸弟數人爲親王何所不可而必藉承襲莊親王以加厚於十六阿哥乎見今廉親王怡親王履郡王朕皆封以親王郡王矣大阿哥之子弘昉一閒散宗室亦見居親王邸第豈伊本分所應得乎且如發遣一人卽謂朕報復舊怨擢用一人又謂朕恩出於私今諸王大臣具在朕所用佛格尹泰等何私之有佛格係宗室輔國將軍在皇考時無薦舉之者故未蒙錄用朕聞其人可用或有裨政事是以擢爲尙書尹泰爲人明達伊係四格親戚或曾在二

阿哥處行走一二次亦未可定 皇考惜其材品仍授爲盛京佐領今朕旣知之何忍置之閒曹夫天子簡用所知之人乃分內之事非臣下所可妄議也勒什亨儉邪小人伊父蘇努係七十之黨結爲生死之交七十等朋比爲姦搖惑人心擾亂國事朕於蘇努父子宥其罪戾疊沛恩施封蘇努爲貝勒授勒什亨領侍衛內大臣御前行走亦冀其感念國恩悛改舊惡豈知伊等心無饜足仍然結黨營私護庇貝子允禔代爲枝梧巧飾將朕所交之事顛倒錯謬以致諸事掣肘難於辦理又朕諸弟兄家有姦惡太監數人種種引誘伊主若明正其罪詳審究擬則牽連伊主之處甚多朕念兄弟之情加意保全不加明訊將此輩姦惡小人發遣遐方令其疏遠曾謂勒什亨曰此不過懲治家人其事甚細不必記在檔案而勒什亨顯背朕旨記在檔案復以懇給佐領冒昧陳請狂妄

背謬勒什亨不可在內廷行走著革職發往西甯跟隨允禔效力
又我朝舊制行軍之處必派王公等前往大將軍王允禎到京後
未定應行回任與否經諸王大臣酌議將貝子允禔派往軍前駐
紮西甯此不過爲國事邊疆起見而允禔怠慢不肯起程奏云俟
過百日又云俟 陵寢回來屢次推諉延時日誠屬何心且允
禔之太監何玉柱一至微至賤之人而使有家貲數十萬伊府管
領何人不可用而用一漢給事中秦道然豈非欲耀內廷太監以
財利而要外廷漢人之稱譽乎如此作爲朕猶並未革其貝子降
其俸祿撤其家奴所懲治者特一二姦惡太監耳而遽謂朕陵倡
弟輩揚言無忌悖亂極矣朕受 皇考洪恩歷年身居藩邸享安
閒之福登極以來不辭勞瘁治益求治安愈求安誠以 皇考付
託神器至重思欲仰副 皇考知人之明事事必求至當爾諸臣

理宜感發天良靖共爾位同心協力翼贊朕躬乃爾等之職分朕爲普天率土之主爾等莫非臣下若任爾等之縱恣朕何以對

皇考乎魯論有曰三年無改於父之道可謂孝矣朕受 皇考鞠

育教誨深恩四十五年今承大統惟思永永無改何止三年是以

朕之弟兄及諸大臣一切過犯無不施恩寬宥如陳夢雷罪大惡

極朕詢問九卿大臣僉云陳夢雷斷不可留應行正法朕猶將伊

免死發遣陶賴張廷樞竟將奉旨發遣之犯陳夢雷二子擅自釋

放朕猶欲保全大臣免其治罪止以降級結案爾等果能悛改惡

習竭力供職一二年後必有誠於中而形於外者朕自必知之如

不悛改不思 皇考六十餘年教養深恩不感戴朕保全寬宥之

意妄生事端干犯法紀朕斷不寬宥總之使朕廣推 皇考之仁

慈惟爾等自勉之使朕昭宣 皇考之天威亦爾等自取之朕仰

體 皇考聖心仁愛欲保全爾等之意實出於至誠爾等務必成

全朕之孝思焉特諭○以拉錫希布爲內閣學士由少詹事遷○辛酉

以張聖佐爲兵部左侍郎由順天府丞遷○予故莊親王博果鐸祭一次

造墳立碑諡曰靖○壬戌召董永茂來京以秦國龍爲福建按察

使由御史遷召張安世來京以甘國奎爲湖南按察使由山西河東道遷召李

繼謨來京以白洵爲廣西按察使由雲南永昌道遷○癸亥諭禮部朝廷

每遇覃恩詔款內必有旌表孝義貞節之條邇來直省大吏往往

視爲具文並未廣諮遠訪山僻貧寒之人或菽水養親天性篤孝

或柏舟矢志之死靡他鄉鄰嗟歎爲可欽而姓氏不傳於城邑何

可勝數爾部卽行傳諭督撫學政務加意搜羅題奏旌獎勿以匹

夫匹婦而輕爲阻抑勿以富家巨族而濫爲表揚以副朕成俗化

民至意○實授陳守創總督倉場侍郎○總管內務府大臣莊親

王允禩等奏順貞門爲內廷禁近之地請將旗下護軍更換令內府護軍等看守分爲六班並於內府三旗內每旗補放管轄之員以司稽察得旨每旗著補放統領一員定爲三品餘依議○都察院奏科道等員內升外轉得旨升轉拘定年限未爲允協如外任好官因一盜案註誤不得升遷豈不可惜嗣後科道官內升外轉不必拘定歷俸年限俱行開列○甲子諭禮部奉 皇太后懿旨側妃年氏封爲貴妃側妃李氏封爲齊妃格格鈕祜魯氏封爲熹妃格格宋氏封爲懋嬪格格耿氏封爲裕嬪爾部查例具奏○乙丑宗人府題輔國公揆慧因昏憤不端革退其應襲公爵除溫良郡王猛戡之子輔國公延信並無別子請將延信改爲襲封輔國公得旨延信兼二公爵著封爲貝子○丙寅諭六部尙書侍郎等各部屬員旣各分司則各有職守彼此不得干預况每司滿漢共

有六員不可謂辦事無人若皆闕允貪庸何難指名題參另易其人安用他司越俎代庖乎此明係鑽營包攬爲漁獵之計嗣後不論何司不論滿漢永遠不得藉才能之名一人兼攝數司之事若有緊要事件暫時派出指辦一二事尙可○諭禮部國家掄才大典首重試官主考憑房考閱薦之文定其去取則一榜衡鑒之當否係於分校諸臣之賢不肖亦匪輕矣近科以來 皇考慎重闢門額俊之典於順天鄉試及會試房考官慮其人邪正不一特命每房各用二人同閱試卷使之互相覺察彼此鈐制用意良爲周密但法久弊生一房兩考官豈皆遇秉公持正之人設有一狡黠者參雜其閒卽爲賢者之累况兩人或皆不肖則朋比作姦爲弊更甚嗣後仍著照原定科場條例各房止用一人校閱其責旣專其功罪亦難推諉務俾鎖闥清肅悉拔真才以仰繼 皇考旁求

俊父之志○諭都察院各衙門募設書辦不過令其繕寫文書收貯檔案但書辦五年方滿爲日旣久熟於作弊甚至已經考滿復改換姓名竄入別部姦弊叢生更有一等缺主名色掌握一司之事盤踞其中交通賄賂上下朋姦書辦尙有更換缺主總無改移子孫世業遂成積蠹自後書辦五年考滿之後各部院堂司官查明勒令回籍聽選如有逗留不歸者飭令五城司坊官稽察遣逐其缺主倚恃勢力抗違潛匿者刻卽參究押解回籍各部院一年一次保結具奏儻仍有潛居京師者或經朕聞知或被科道題參將出結之大臣官員一併治罪○諭科道等官 皇考臨御六十餘年至聖至明無日不以國計民生爲念凡所以諮訪吏治通達民情之意至爲殷切邇年以來無知小人見科道疏章稀少遂疑皇考不甚信納羣言又譏言官皆緘默取容此大失 皇考本

懷真所謂坐井觀天也當時內而滿漢大臣外而督撫提鎮皆許其密摺言事蓋因各省地方事務督撫身親閱歷自能詳悉周知較言臣風聞言事勝什倍矣以此皇考據所聞見折衷行之大小國政措置咸宜言官無所用其建白而實則天下之利弊無不洞燭於聖心也朕仰承大統一切遵守成憲尤以求言爲急在京滿漢大臣外省督撫提鎮仍令摺奏外爾等科道諸臣原爲朝廷耳目之官凡有所見自應竭誠入告絕去避嫌顧忌之私乃爲忠盡若此時不能盡言卽後日官至大僚豈能期爾建立謀猷乎今著各科道每日一人上一密摺輪流具奏一摺止言一事無論大小時務皆許據實敷陳卽或無事可言摺內亦必聲明無可言之故在外候旨或召令面見或令且退其所言果是朕卽施行卽或未甚切當朕亦留中不發不令人知儻有徇私挾讐等情巧爲

瀆奏亦不能惑朕之耳目也摺內之言不許與人參酌如有漏洩或同僚知而言之則同僚即可據以密聞朕將兩人之摺合驗情事必不能隱諱推諉矣至於有能面折廷諍或彈劾權要或更革弊端不妨仍以露章奏聞朕亦不拒又朕居藩邸時在朝大小官員及皇考御前之人以至藝術之流從無熟識往來者卽藩邸豈無素所任使之人然從不假以顏色信用其言今朕躬攬大權所用一二大臣皆深悉其人可用而用之非有念舊徇徇之心誠恐向日效力微員藉稱王府舊臣在外招搖嚇騙生事干法其害甚大斷難姑容爾等可不時留心察訪一有聞見著卽密參切勿畏忌爾諸臣其敬承明諭各抒忠悃毋負朕懸輶設鐸之意○諭直省督撫爾等抵任每使家丁管理事務號爲堂官往往串通中軍旗牌威嚇勒索且使潛往各屬探聽事件各屬皆有坐省家人

與督撫司關一氣相通爾謂甚密而彼已知之因得豫爲賄屬若誤信其言則是非顛倒爲害滋甚至走差齎本之人每至驛遞扣勒多端騷擾百出尤屬不法嗣後著永行禁止堂上辦事則遣佐貳官輪班值日奔走出差則於衙役中擇家道殷實謹厚熟練之人分任仍嚴加察訪若招搖生事卽行革退○以直隸河南山東窮民就食來京者多倍增五城粥廠銀米展期一月○丁卯

聖祖仁皇帝陵曰景陵○命廉親王允禩管工部裕親王保泰

管理藩院○戊辰改直隸古北口總兵官爲提督陵寢副將爲

總兵官○以佟吉圖爲山東布政使程光珠爲山東按察使

○己巳恭上大行皇帝尊諡曰合天弘運文武睿哲恭儉

寬裕孝敬誠信功德大成仁皇帝廟號聖祖頒詔天下覃恩

有差○庚午祭哈爾厄魯特佐領羅卜藏錫拉布藍翎侍衛垂木

丕爾等逃遁詔捕獲之遣侍衛達爾郎中鄂賴前往撫其餘眾○

辛未趙之垣緣事革職以李維鈞爲直隸巡撫

由字道遷

○給川陝總

督年羹堯二等阿達哈哈番世職並加其父原任巡撫年遐齡尙

書銜○壬申命在京部院復行三年考察例○癸酉行百日大祭

禮上詣

壽皇殿躬親奠獻哭泣盡哀諸王大臣等奏

皇上

追念

先皇悲思篤切躬襄大事勞瘁倍常伏懇強制哀情仰慰

先皇付託之命其詣

壽皇殿拜奠之處乞多隔數日得旨朕

因

皇考付託鴻基之重故愛惜此身於臣子哀慕之道十分未

盡二三朕非強飾以取孝名但朕受

聖祖皇考四十五載顧復

教育深恩今一旦永訣中心悲痛何能自己目今尙可瞻仰

梓

宮罔極哀思乘此猶可稍展至

梓宮睽隔之後何由再得瞻仰

皇考乎朕躬尙能自持朕亦盡力強制諸王大臣所奏知道了

○甲戌以胡期恆爲陝西西安布政使

由四川東道遷

○永泰緣事革

職以王景灝爲陝西西安按察使

由臨洮府遷

○實授傅德陝西甘肅

布政使以劉世奇爲陝西甘肅按察使

由成都府遷

○以西陲用兵青

海王台吉等效力有年親王羅卜藏丹津加倖進爵有差○戊寅

晉封喀爾喀郡王額駙敦多卜爾濟爲親王額駙台吉策零貝勒

丹津多爾濟俱爲郡王輔國公博貝爲貝勒○己卯諭吏部虧空

錢糧各官若革職留任催追必致貽累百姓伊等旣已獲罪革職

豈可復留原任嗣後虧空錢糧各官卽行革職著落伊身勒限追

還若果清完居官好者該督撫等奏明著通行直隸各省督撫知

之○副將軍阿喇衲奏報羅卜腦兒回人古班爾等率領哈喇庫

爾薩達克圖哈喇和邵三處戶口一千餘人輸誠投順○是月免

荊州鍾祥等四州縣康熙六十一年旱災額賦有差

三月辛巳革職留任禮部左侍郎王思軾以老病乞休命復還原職致仕○癸未命建故一等公佟圖賴佟國綱圖海等祠春秋致祭贈圖海太師國綱國維太傅○甲申撤西藏駐防官軍及西甯八旗兵設戍於察木多○命吏部定直省督撫兼銜○加隆科多馬齊年羹堯太保○兵部議覆川陝總督年羹堯奏川陝事宜一打箭鑪之外中渡河口係通西藏要隘請將分駐嵐州之化林協守備移駐中渡建立土城撥把總一兵二百隨往分防一保縣在大河之南爲土番出入隘口防汛不可不增請撥威茂營千總一兵一百名移駐保縣以資防禦一松潘口外各番部落不一而阿樹一處最爲緊要今止給以委牌暫令土目管理終不足見信於羌番請給長官司職銜以資鈐束一建昌所屬越嶲衛地方甚爲寥闊每多蠻獍出沒搶奪今僅設守備一員兵二百五十名實難

分撥防禦請改設遊擊一見在守備卽爲中軍再添千總一把總一兵二百五十分防彈壓一大金川土司之土舍色勒奔曾因出兵羊崗著有勤勞請給以安撫司職銜分小金川土司之勢一烏蒙土府地界最廣姦目達木等自土司祿鼎乾故後益逞兇暴土舍祿鼎坤祿爲固情願擒獻俟二人擒獻達木給以土職各管其地下部議從之○乙酉諭部院各衙門凡一應衙門卷案各有典守之官稽查引據全以舊檔爲憑此固一代之典冊六官之掌故不得視爲具文也收貯卷案封禁雖嚴而翻閱查對不能脫書吏之手盜取文移改易字蹟百弊叢生莫可究詰嗣後司官遷轉將所掌卷案新舊交盤各具甘結說堂存案如有疏失換易等弊一經發覺與受同罪爾各部院衙門急宜查覈清楚設法封貯永杜弊端不得因卷案浩繁畏難退阻其交盤事例爾部院諸臣公同

確議具奏尋議各衙門卷案俱應呈堂用印收貯遇有查閱滿漢司官親身驗看升轉之日出結交代並請揀發專寫檔案筆帖式三年無誤保送補用從之○諭吏部各省督撫衙門事繁非一手一足所能辦勢必延請幕賓相助其來久矣但幕賓賢否不等每有不肖之徒勾通內外肆行作弊黜陟屬員則清濁溷淆申理訟獄則曲直倒置敗督撫之清節誤督撫之功名彼則置身事外飽橐而去殊屬可恨夫今之幕客卽古之參謀記室凡節度觀察等使赴任之時皆徵辟幕僚功績果著卽拜表薦引彼愛惜功名自不敢任意苟且嗣後督撫所延幕客須擇歷練老成深信不疑之人將姓名具題如效力有年果稱厥職咨部議敘授之職位以示砥礪該部詳議具奏尋議各省督撫應將幕客姓名造冊報部勤慎無過者照應得職銜卽用無職銜特疏舉薦者從優議敘如徇

私保舉照徇庇例議處從之○丙戌諭吏部行取知縣今年著停止俟雍正二年舉行○戊子追封 皇后之父費揚古爲一等公

其子孫襲封一等侯○封川陝總督年羹堯爲三等公○庚寅諭

大學士等侍郎王懿在軍前效力已久亦有年紀著原任江西巡

撫王企靖前往更換協辦軍需錢糧見今大將軍處事少兵部侍

郎查克旦原任湖北巡撫張連登吏部侍郎王之樞俱著交與年

羹堯在布隆爾地方墾地築城仍著帶伊原品效力○調黃叔琳

爲吏部左侍郎以盧詢爲刑部右侍郎傅德署甘肅巡撫由布政使署

○調常壽爲兵部左侍郎以尹泰爲工部右侍郎諾敏爲內閣學

士署工部侍郎由戶部郎中遷○辛卯調刑部左侍郎王景曾在禮部侍郎行走以馬爾齊哈爲額外內閣學士署刑部侍郎事由額外郎中遷○

以石文焯爲河南巡撫董永茂爲江南安徽布政使由福建按察使遷○

以高其佩爲光祿寺卿辦理刑部侍郎事彭振翼爲四川按察使

由甘肅同知遷

○解戴鐸任以羅殷泰爲四川布政使

由吏部郎中遷

○壬辰諭

總理王大臣等吳爾占所犯之罪甚重朕卽位伊始未曾誅戮一

人吳爾占又係宗室朕不忍將伊卽正典刑著從寬免死從前伊
獲罪於 皇考貶其親王之爵伊等怨望肆行誹謗 皇考深知

伊等承襲王爵者不知感恩不承襲者又生怨望是以未令承襲
伊等希圖王爵互相侵害陷伊宗嗣於死地色亨圖又覬覦王爵
各處鑽營卒不能得復生怨望去年在南海子舉止傲慢以致

皇考震怒伊等俱屬無知妄亂不安本分之人不可容留京師經
希之子並吳爾占父子色亨圖父子給假五日料理發往盛京到
盛京時無論城內城外令其在五十里內居住伊等屬下佐領交
與該旗請旨朕另有處置包衣佐領內令其酌量力能養贍人數

帶往其餘交該旗請旨至於一切器用交與伊隨往之家人限兩箇月務令收拾清楚起身前去不可潛留一人儻仍來往京師暗

通音信彼時朕不得已定按律治罪○召許兆麟來京以石成義

爲江西布政使

由候補道遷

○癸巳轉景日昫爲禮部左侍郎以蔣廷

錫爲禮部右侍郎仍在學士裏行走○吏部遵旨議覆直省督撫兼銜查川陝總督統理西安甘肅四川三處事務控制番羌兩江總督統理江蘇安徽江西三處事務地連江海俱應授爲兵部尙書兼都察院右都御史其餘總督及各省巡撫仍照舊例由各部侍郎以及別項官員補授總督者俱改爲兵部右侍郎兼都察院右副都御史由侍郎補授巡撫者亦改爲兵部右侍郎兼都察院右副都御史由學士副都御史及卿員布政使補授巡撫者俱授爲右副都御史由左僉都御史補授巡撫者改爲右僉都御史永

爲定例從之○命奉旨速議事件限五日覆奏○甲午諭禮部

至聖先師孔子道冠古今德參天地樹百王之模範立萬世之宗師其爲功於天下者至矣而水源木本積厚流光有開必先克昌厥後則聖人之祖考宜膺崇厚之褒封所以追溯前徽不忘所自也粵稽舊制孔子之父叔梁公於宋興宗時追封啟聖公自宋以後歷代遵循而叔梁公以上則向來未加封號亦未奉祀祠庭朕仰體 皇考崇儒重道之盛心敬修崇德報功之典禮意欲追封五代並享蒸嘗用申景仰之誠庶慰羹牆之慕內閣禮部可會同具奏○乙未命詳定 陵寢風水攸關之處各樹紅椿設禁其遙遠無礙者聽民樵採○丙申刑部議奏臺灣叛賊鄭文遠等家口應分別定罪得旨凡謀反大逆以及謀叛重罪均無可宥按律凌遲處死正法之祖父子孫兄弟及同居之人期親及伯叔父兄弟

之子不限已未析居男十六以上不論篤疾廢疾皆斬但此案事起倉卒遠隔海洋親屬人等有身在臺灣者亦有身在內地者若概從誅戮情堪憫惻除身在臺灣者依律正法外其內地者從寬免死解部給與功臣之家爲奴該督撫逐一詳查應行正法者正法應行解部者解部○丁酉資送直隸山東河南流民回籍○己亥復輔國公普照原爵○以署吏部侍郎李紱署左副都御史○以鄂賴爲內閣學士由理藩院郎中遷○庚子諭禮部明季帝王皆不親送梓宮故令親王大臣奉主回京朕既親往若不躬奉神主於心何安俟山陵事畢點主禮成朕親奉皇考神主回京途間如何分站及先還預備奉迎之處一併詳議具奏○辛丑諭戶部陝省自軍興以來大兵駐紮運糧餉供草豆無一不需民力皇考每爲軫念今當大沛恩膏子惠元元所有康熙六十年以

前陝西全省民屯衛所未完銀米豆草悉予蠲免該部作速行文

毋得遲留○吳存禮緣事革職以何天培署江蘇巡撫由京口將軍遷○

解李世仁任以鄂爾泰為江南江蘇布政使由內務府員外郎遷○以黃叔

琬為福建布政使由太僕寺少卿遷○召宋致來京以鄭任鎬為湖南布

政使由翰林院侍講學士遷○以劉廷琛為廣西布政使原任布政使○移奉天

錦州府通判駐義州義州巡檢駐天橋廠○壬寅以巴泰為吏部

左侍郎由左副都御史遷史貽直署吏部右侍郎由翰林院侍讀學士遷○以遲維

臺為湖南按察使由廣西蒼梧道遷○甲辰加左都御史朱軾吏部尚書

銜○江蘇積欠蘆課學租等項撫臣請豁免部以不符詔款議駁

上曰此雖非恩詔內應免之項但歷年最久儻行催徵窮民必

致受累著一併豁免○乙巳晉封輔國公阿布蘭為貝勒○以史

貽直為內閣學士仍署吏部右侍郎由翰林院侍讀學士遷○封厄魯特額

駙色布騰旺布爲貝勒輔國公多爾濟色卜騰爲貝子○丙午

聖祖仁皇帝梓宮發引 上恭送至 景陵啟鑾○己酉以伊都

立署內閣學士

由詹事署

○是月免東平厯城濟南等四十九州縣衛

康熙六十年旱災壽張等五州縣康熙六十一年水災額賦有差

夏四月辛亥 聖祖仁皇帝梓宮至 景陵奉安於 享殿○王

子行奉安 享殿禮 上哀慕依戀欲留駐 山陵數日諸王大

臣懇請乃 回鑾是日駐蹕豪門村南○命貝子允禩留駐 陵

寢附近之湯泉於大祀日行禮○諭禮部 景陵辦理修飾甚好

十七阿哥孫渣齊薩爾納甚屬盡心敬謹效力十七阿哥封爲郡

王孫渣齊薩爾納從優議敘○乙卯 上還京師○禁差員騷擾

蒙古○丙辰命怡親王允祥管理戶部○命察八旗年老人員有

獨子在軍前者奏聞○設繙譯科○戊午總理王大臣等以 聖

祖仁皇帝梓宮奉安 山陵大禮已成奏請 上御門聽政得旨
諸王大臣所奏雖是但 皇考梓宮尙在 享殿安奉朕今卽臨
御正門理事心實不忍念 皇考付託重大節養朕身一切禮儀
多有未盡每以天下萬民事關緊要勉強照常辦理亦無遲誤至
御門理事俟 皇考梓宮奉安 地宮之後再爲舉行○庚申諸
王大臣復援據典禮再三懇請 上御門聽政乃允之○辛酉封
怡親王允祥子弘昌爲貝子○壬戌命黑龍江船廠歲派科道部
院官經理其事○以范時捷署西安巡撫由甯夏總兵官遷○癸亥諭總
理王大臣等朕臨御以來時以天下蒼生爲念凡自外省來京之
員各處雨暘豐歉必面加詳詢蓋欲周知民隱也今差往致祭華
嶽侍講學士田文鏡回京朕詢彼經過地方情形與百姓生理據
奏山西平定州壽陽縣徐溝縣祁縣等處雨澤歉少民間生計維

艱汾州府屬得雨亦未霑足地方官見在徵比錢糧夫巡撫以撫綏地方愛養百姓爲職今平定壽陽等處黎民饑饉並未奏請賑濟緩徵反行催科小民何以存濟此皆因伊等去年曾奏報得雨今欲掩飾前言甚屬不合巡撫德音布政使森圖著交該部察議仍卽命侍講學士田文鏡會同巡撫德音率領地方官員將平定等四州縣饑民速行賑濟務使恩澤實霑撫養得所毋羈時日以致羣黎失業○甲子諭直隸各省督撫國家敦勵風俗首重賢良舉髦士以勸秀民實爲政教之大端凡封疆大吏宜共體此意廣詢博訪不可視爲具文漫不加察也前所頒恩詔內有每府州縣衛各舉孝廉方正暫賜以六品頂戴榮身以備召用一條距今數月未有疏聞豈通都大邑之中海濱山陬之遠遂無潛修砥操克稱俊乂可應詔旨者歟誠恐有司怠於採訪雖有端方之品無由

上達殊負殷殷延攬之至意特著直省督撫速遵前詔確訪所屬
果有行誼篤實素爲鄉黨所推者卽列名具奏毋得隱蔽及濫列
塞責○直隸巡撫李維鈞奏原任署撫趙之垣應發回原籍合川
陝督臣清查伊叔趙弘燮家產以完帑項得旨 皇考御極六十
餘年用人之道嘉善獎能不吝爵賞宥罪赦過率多矜全如勇略
將軍趙良棟乃心王室忠勇素著始終宣力 皇考待以隆恩異
數超越等倫其子趙弘燮承襲餘蔭位任封疆不思竭力報稱惟
圖利偷安以致事務廢弛庫帑虧空 皇考不忍遽加罷斥寵遇
如初格外優容冀其改悔迨至病故又令伊姪趙之垣往署撫篆
爲之料理一切未完事件蓋不欲其行事一朝破露遂罹國法有
損先人名節耳 皇考之所以待功臣者至於如此亦云厚矣朕
繼承大統卽洞悉趙之垣暗昧無知萬難勝任然猶仰體 皇考

深仁厚澤曲加優庇面飭訓諭數次乃趙之垣怙終不悛昧於大義具捐銀三十萬兩始知前此所聞勒要屬官銀兩進上之言並非虛語試問此銀出於何所直隸全省數十萬民生繫於巡撫一人之賢否奉職無狀貢納財物謂可邀免有是理乎畿輔重地貽誤匪輕特令解任准其暫回原籍仍著速來完補伊叔任內虧空俟其完日另降諭旨猶是 皇考厚待功臣之意也趙氏子孫忍負國恩 皇考與朕甯忍負功臣後裔耶該部速將此諭行文川陝總督出示曉諭使咸知朕意○乙丑諭翰林院自古帝王臨朝施政右史記言左史記動蓋欲使一舉動一出言之微無不可著爲法則垂範百世也 皇考聖祖仁皇帝英年踐阼卽設日講起居注官於詞臣中擇其才品優長者以原官充補鉅典茂昭度越前代誠爲聖帝哲王之盛事御極六十一年紹精一執中之統

勵敬 天勤民之心文謨武烈經緯萬幾盛德日新大業宏顯天
下臣民仰瞻至治不啻日月麗天江河行地莫不敬信悅服記注
之臣美不勝書 皇考聖祖仁皇帝謙德彌光聖不自聖惟恐史
官或多溢美之詞故康熙五十六年以後裁省記注祇令翰林五
員於理事時輪侍班行凡重務要旨仍令內閣諸臣記而存之意
至周深也茲朕續承大統夙夜兢業日昃不遑思所以上繼 皇
考功德之隆下致四海晏安之治願惟涼德深懼負荷之難今御
門聽政之初益當寅畏小心綜理庶事咸期舉措允宜簪筆侍臣
何可闕歟當酌復舊章於朕視朝臨御祭祀 壇 廟之時令滿
漢講官二人侍班不獨記載諭旨政務或朕有一言之過一事之
失皆必據實書諸簡策朕用以自儆冀寡悔尤庶幾懷淵冰之懷
以致久安慎樞機之動以圖長治其仍復日講起居注官如康熙

五十六年以前故事爾衙門卽遵旨行○封十七阿哥允禮爲果郡王○丙寅命國子監丞助教等官停用捐納○丁卯 上初御乾清門聽政○諭滿漢文武大臣官員等朋黨最爲惡習明季各立門戶互相陷害此風至今未息惟我 皇考允執厥中至仁在宥各子保全不曾戮及一人爾諸大臣內不無立黨營私者卽宗室中亦或有之爾等若以向蒙 皇考寬大幸免罪愆仍蹈前轍致干國法昏昧極矣豈但滿洲卽漢人亦與一家骨肉無異何苦波累及之夫人之性情各有所向豈有與通國之人無不投契之理但辦公事不可存私今諸大臣俱在朕前朕居藩邸曾與爾等議及私事密相往來乎 皇考知朕中立不倚是以命朕繼承大統朕自思之亦惟朕方能不戮一人無一人不保全耳朕非獨因 皇考付託之重實感 皇考四十餘年教養深恩委曲周至

言念 宏慈昊天罔極此朋黨之習爾諸大臣有則痛改前非無
則永以爲戒爾等當思 皇考數十年寬厚之恩亦當共體朕委
曲保全至意若仍怙惡不悛朕雖欲勉強仰體 皇考聖衷力爲
寬宥豈可得乎夫朕言是卽宜遵行朕言非卽宜陳奏朕未嘗拒
也朕屢詔求言雖小臣欲進言者咸得上達每多召人屏去左右
令其面陳爾諸大臣非不得奏之人乃隱匿不奏退有後言某人
不當用某事不當行誠小人之惡習也夫朕所用之人所行之事
如有不當爾等身爲大臣何難陳奏所言果是朕卽用之如不奏
而但肆譏議設有人詰以不奏之故能無愧於心耶賢者朕之所
好爾等卽宜好之不肖者朕之所惡爾等卽宜惡之乃或其人爲
朕所信任盡心竭力於國家之事則反謂其專擅作威如此人孰
肯效其所爲自取誹謗乎其或唯諾成風諸事不問但思自便其

身爲己則得矣於國何補夫君親大義也譬若父之讐則與之相
愛父之愛則與之爲讐爲人子者有是理乎要之以君之好惡爲
好惡然後人人知改其惡而遷於善君臣一心國之福也傳之萬
世亦有令名爾等其祇承朕諭○諭大學士等爾等皆 皇考簡
任耆舊大臣論年齒雖與 皇考相等若經歷事務豈能仰及
皇考萬一 皇考實足爲爾等之師是以爾等但能遵奉 諭旨
者斯稱善已朕自幼未曾理事 皇考命朕紹承大統朕深念付
託之重凡朕所降諭旨爾等以爲是則曰是以爲非則卽諫奏勿
得面從雖封還硃批諭旨朕亦深喜斷不譴責若但隨聲附和致
自取辱非朕所望也○諭領侍衛內大臣八旗大臣等國家武備
關繫重大爾等皆有訓兵責任昔 皇考嘗躬率士卒寓訓練於
較獵之中 皇考騎射超倫士卒無不欽服各相鼓勵並非爾等

訓練所致朕不能企及 皇考則訓練之事惟爾等是賴但訓練士卒有實心操習者亦有虛應故事者若爾等按期較射以圖塞責不過閒談飲茶而散則不但徒勞軍士爾等亦徒多往返何益之有此皆朕居藩邸時素所深知者爾等能盡職朕必全爾等顏面爾等亦宜全朕繼述之孝思嗣後爾等務宜實力訓練比來軍士生計稍艱 皇考教養六十餘年恩賚頻施無不周備以天下之正供贍養兵丁如此外再欲加增錢糧亦恐難給兵丁生計之艱其故雖多大抵因奢侈所致爾等皆管轄兵丁之人應將平素守分者加以優獎奢侈者加以訓飭則自知懲勸矣此事一時亦難以移易朕與爾等約以三年爲期如三年後仍不能改爾等之罪不止罷黜勿希復用彼時勿更怨望○禮部遵旨議覆 孔子先世五代俱應封公爵以明隆典得旨五倫爲百行之本天地君

親師人所宜重而天地君親之義又賴 師教以明自古師道無過於 孔子誠首出之聖也我 皇考崇儒重道超軼千古凡尊崇 孔子典禮無不備至朕蒙 皇考教育自幼讀書心切景仰欲再加尊重更無可增之處故敕部遍封 孔子先世五代今部議封公上考歷代帝王皆有尊崇之典唐明皇封 孔子爲文宣王宋真宗加封至聖文宣王封 孔子父叔梁紇爲齊國公元加封 孔子爲大成至聖文宣王加封齊國公爲啓聖王至明嘉靖時猶以王係臣爵改稱爲 至聖先師孔子改啓聖王爲啓聖公王公雖同屬尊稱朕意以爲王爵較尊 孔子五世應否封王之處著詢問諸大臣具奏○直隸撫臣奏請捐築太行等隄 上不允命給帑○戊辰除山西陝西教坊樂籍改業爲良民○癸酉吏部議奏山西巡撫德音布政使森圖隱匿地方災荒既不奏報又

不停徵應革職得旨德音從寬免其革職著來京在學士任效力行走其員缺著內閣學士諾岷補授布政使森圖人不及著革退在驍騎參領效力行走其員缺著順天府府丞連肖先補授○甲戌追封故阿達哈哈番佟養真爲一等公加贈太師諡忠烈○乙亥諭戶部朕臨御以來宵旰憂勤凡有益於民生者無不廣爲籌度因念國家承平日久生齒殷繁地土所出僅可贍給偶遇荒歉民食維艱將來戶口日滋何以爲業惟開墾一事於百姓最有裨益但向來開墾之弊自州縣以至督撫但需索陋規致墾荒之費浮於買價百姓畏縮不前往往膏腴荒棄豈不可惜嗣後各省凡有可墾之處聽民相度地宜自墾自報地方官不得勒索胥吏亦不得阻撓至升科之例水田仍以六年起科旱田以十年起科著爲定例其府州縣官能勸諭百姓開墾地畝多者准令議敘督撫

大吏能督率各屬開墾地畝多者亦准議敘務使野無曠土家給人足以副朕富民阜俗之意○命卓異官員留京以應升之缺用○丙子諭宗人府瀋郡王數年以來安分守己敬順小心朕御極後尤竭誠盡敬於 皇考大事一應典禮不顧殘廢勉曲盡殊屬可嘉著晉封親王○丁丑 孝陵著草生馬蘭口總兵官范時繹奏聞恭進 上命傳示廷臣無不驚喜贊頌以爲奇瑞○命各省總兵官俱以摺子奏事○給戶部尚書孫渣齊內務府郎中薩爾納拖沙喇哈番世職○戊寅發內帑九十萬給入旗及內務府三旗經理生息以備護軍校及馬步兵等喜喪之用○是月免山東德州章邱臨清等四十四州縣衛康熙六十年旱災江南海州桃源徐州等十一州縣衛康熙六十一年旱災額賦有差
五月己卯朔禮部等衙門奏請 御殿受朝諭朕原欲周年之後

始升御正殿今諸臣援引古典合詞懇奏朕限於禮制勉從所請其奏樂賜茶著停止○擢薩爾納爲左副都御史辦工部侍郎事

由內務府郎中遷

○實授馬爾齊哈內閣學士○壬午加武英殿大學士

王頊齡太子太傅○議敘追捕厄魯特羅卜藏錫拉布等並收管未冒逃遁厄魯特人員功封喀爾喀貝勒旺扎爾爲郡王公策布登策木楚克納木扎爾爲貝勒贈陣亡蘇尼特台吉進達克爲輔國公察哈爾副總管公額孫等世職弁兵等賞卹有差○甲申諭內閣湖北布政使員缺朕熟思數日不得其人著大學士尙書都御史侍郎副都御史等各保一人密摺封奏如更有堪任他職者亦併繕入再有裨政事啟沃朕躬之言並附陳奏務宜謹密所奏必出於公正儻有交通約會等情經朕聞知不獨見輕於朕且彼此非笑亦當顧惜尙其慎之○諭禮部近日天時頗旱 皇考先

年屢降 諭旨云大喪之後必有旱年 太皇太后 世祖章皇

帝 皇太后皇后之事俱曾經過朕當此之際嘗恐懼於懷而未

置也三月十二日雨雖霑足朕曾兩三次以做惕之意曉諭諸人

三月以來多風少雨遂覺旱乾再直隸山東山西河南地方連年

雨水不調田禾歉收朕雖遣大臣官員賑救當此旱時民必皇皇

朕心甚以爲慮朕在宮中久已盡心虔誠祈禱爾部亦虔誠祈禱

諸大臣各敬謹齋戒○諭八旗大臣步軍統領及都察院大小官

員有一定之品級卽有一定服式所以重名器辨等威也近多不

按品級佩帶數珠且馬懸纓前用導馬更有將紬爲坐具者尤屬

僭越嗣後應各按品級遵奉定例而行爾等嚴加稽察有仍前僭

越卽行參處大臣官員亦毋得徇情隱庇再舊例諸王等以數珠

鞍轡賞其屬下許令服用今後著將賞用之處行文該旗存案年

終彙奏以便稽查○直隸巡撫李維鈞奏直隸從前虧空計州縣歲之所餘積累填補二年督令清理得旨州縣官令少從容不慮窘乏方可責其盡心撫字少有餘貲亦可自爲地方興利之舉何可勒令爲他人補苴虧空耶○乙酉諭宗人府鄭家莊修蓋房屋駐紮兵丁想 皇考聖意或欲令二阿哥前往居住但未明降

諭旨朕未敢揣度舉行今弘皙已封王令伊率領子弟於彼居住甚爲妥協其分家之處見今交與內務府大臣辦理其旗下兵丁擇日遷徙之處俟府佐領人數派定後舉行弘皙擇吉移居一切器用及屬下人等如何搬運安置何日遷移兵丁如何當差府佐領人等如何養贍及如何設立長久產業之處著恆親王裕親王溥親王貝勒滿都護會同詳議具奏一切供用務令充裕勿使伊艱難並貽累屬下之人彼處離京二十餘里不便照在城居住諸

王一體行走除伊自行來京請安外其如何上班會射諸事著一併議奏尋議理郡王弘皙遷移鄭家莊山兵部領取車輛將需用物件載往其給與理郡王人數共三百四十五名見有護軍領催馬甲並親隨執事等均給錢糧令其當差行走鄭家莊城內原有房四百間如尙不敷再行添造見有欽放長史一員所請護衛十二員暫行跟隨侍衛三員藍翎侍衛一員俟有缺出照例咨部題明補放鄭家莊離京二十餘里升殿之日理郡王聽傳來京每月朝會一次射箭一次從之設駐防鄭家莊城守尉一佐領六防禦六驍騎校六筆帖式二領催二十四名兵五百七十名○命八旗外任廢官准於臺站效力自贖優者予議敘○九卿分別議敘四川蓋造營房官員得旨議敘四川蓋造營房一事前則不及今又太過議事以公平正直爲主何至參差如是若朕欲加恩何難特

發諭旨所以令諸臣公議者原以求其至當朕本無成見爾諸臣宜矢公矢慎共襄盛治凡事當理卽合朕意逢迎之術斷不可用○丁亥廣西巡撫孔毓珣奏薦梧州府知府張若需等升補蒼梧道等缺得旨蒼梧道員缺業已部選殷邦翰朕聞張若需居官聲名較優所以允行至其餘各員俱照爾所請爾統率一省該屬員自必有深知灼見處始行奏請假若日後改易操行切毋存回護之念姑息從事今日因其賢能而保薦後日因其改易而糾參正見爾之公正無私將朕此旨轉諭伊等俾各知儆懼時加慎勉庶不敢恃被薦在前而稍有放縱也保薦一事甚難或懷銜玉求售之心掩其不善而著其善一被愚惑他日受累不淺斷不可輕忽於一時也朕將合省百萬赤子付託督撫似此薦舉數人有何可疑而不推心信任其閒設有徇情納賄假公濟私實據斷不輕恕

○戊子諭翰林院凡部院衙門俱設司官專管定稿說堂筆帖式專管繙譯廳官專管收發文書翰林院衙門亦有錢糧出入升遷議敘並各衙門文移往來事務煩瑣關繫非輕乃俱出自筆帖式典簿廳之手豈得保無弊端嗣後於俸淺編修檢討內擇才守優長者滿漢各二員充作司官專主定稿說堂庶小吏不得作弊而衙門清肅所委充司官之編檢果實心任事辦理公敏掌院學士據實奏聞加以殊恩○調劉世奇爲四川按察使彭振翼爲陝西甘肅按察使○己丑命大學士等檢閱鄉試落卷士子有回避未應試者特加考試取中○癸巳湖廣總督楊宗仁摺薦廣東南海縣知縣宋瑋升補湖南寶慶府知府廣州守備范宗堯改補湖北漢陽縣知縣得旨各省盡屬版圖在在皆需賢員何地非民何缺非要隔省題官實屬越例假如別省賢員彼之督撫不加褒獎不

行招薦者備將情節聲明密奏則可今因初次朕姑從爾請特諭

○甲午召金啟復來京以張謙爲雲南按察使

由雲南學政按察使司僉事遷

○

乙未諭滿漢九卿詹事科道等天時亢旱朕夙夜焦勞敬謹齋戒

久未得雨意者用人行政之間尙有闕失不能感召天和以致甘

霖未沛朕欲在廷諸臣直言得失猶恐視爲具文概以諛詞頌揚

負朕實心求言之意今特諭爾等各具密摺凡朕所行之事或有

過失務盡言無隱卽所行無過或更有應行事宜亦各據己見陳

奏使朕有則改之無則加勉方得古大臣責難於君之義至用人

一途或有未當爾等務必據實指陳勿避嫌怨卽朕親信重臣不

妨指出上古君臣都兪吁咈至今傳爲盛事爾等若能披肝露膽

極言直諫卽所奏未盡合宜朕亦重其人品儻仍瞻徇依違浮言

塞責朕亦薄其爲人爾等各宜副朕實心果有嘉謨嘉猷俾得見

之政事將召天和而蘇民困胥在於此矣○丁酉命工部尙書徐元夢署大學士戶部尙書孫渣齊辦工部事○戊戌諭大學士等山西平定州等處山多田少粒食恆艱小民向賴陶冶器具輸運直省易米以供朝夕近聞直隸州縣因米貴禁糶此方百姓何以養給昔春秋時諸侯各君其國尙申遏糶之禁今天下一家海內之民皆吾赤子自宜緩急共濟見今陝西督臣運米萬石賑救山西甚愜朕意豈有坐視鄰封乏食反行遏糶之理自今凡鄰近郡邑偶遇荒歉卽行拯恤毋得各分疆界漠不相關其所當禁者富戶規利販米動盈千萬又沿海數省運米出洋玩法網利該督撫提鎮當嚴查禁止至肩負小民貿易度日悉從自便可也著直隸巡撫曉諭鄰近平定州等處州縣不得禁糶以副朕一視同仁之意並諭直省督撫知之○截留江西漕糧二十萬石貯山東備賑

○命山東諸湖蓄水以濟漕運○以河南懷慶等三府缺雨命撫臣勸富戶糴儲粟以備賑○己亥諭大學士等孝經一書與五經並重蓋孝爲百行之首我 聖祖仁皇帝欽定孝經衍義以闡發至德要道誠化民成俗之本也鄉會試二場向以孝經爲論題後改太極圖說通書西銘正蒙夫宋儒之書雖足羽翼經傳豈若聖言之廣大悉備今自雍正元年會試爲始二場論題宜仍用孝經庶士子咸知誦習而民間亦敦本勵行卽移孝作忠之道胥由乎此又聞各省鄉試房考凡州縣官由科甲出身者止許入闈一次夫考官以秉公精鑒識拔人才爲主何論曾否入闈嗣後凡遇鄉科各省督撫臨場調齊科甲出身之員不論已未分房監臨試以時藝一篇其文理優長者爲內簾房考荒疏者俱外場執事則分校得人而佳文盡拔矣朕於雍正元年開科廣額總欲鼓勵人才

興起教化著該部通行直省督撫俾副朕崇教育才之意○上憂
早減膳虔禱甘霖立沛大學士等恭請 皇上復常膳報聞○張

聖弼緣事革職以朱綱爲湖北布政使張保爲河南按察使

山監
察御

遷○賜禮部尙書張廷玉房一所銀一千兩○庚子 仁壽皇太

后不豫 上詣永和宮親視湯藥晝夜無閒○諭總理王大臣等

青海台吉兄弟不睦儻邊境有事大將軍延信駐紮甘州相隔遙

遠朕特將一切事務俱降旨交年羹堯辦理若有調遣軍兵動用

糧餉之處著防邊辦餉大臣及川陝雲南督撫提鎮等俱知照年

羹堯辦理邊疆事務斷不可貽誤並諭延信知之○以徐元夢張

廷玉俱署左都御史○辛丑丑刻 仁壽皇太后崩於永和宮先

是 皇太后久御永和宮禮臣等尊上 徽稱擇日恭進 冊

寶 皇太后命侯 聖祖山陵事成後舉行 上奏請 皇太后

移御甯壽宮亦未允至是奉安 梓宮於甯壽宮 上於蒼震門
內設倚廬縞素居喪每日赴 梓宮前上食三次哀號弗輟羣臣
莫不感泣○諭總理王大臣等貝子允禩原屬無知狂悖氣傲心
高朕屢加訓誨望其改悔以便加恩但恐伊終不知改而朕必欲
俟其自悔則終身不得加恩矣朕惟欲慰我 皇妣皇太后之心
著晉封允禩爲郡王伊從此若知改悔朕自疊沛恩澤若怙終不
悛則國法具在朕不得不治其罪允禩來時爾等將此旨傳諭知
之○諭舅祖岳色 皇妣向欲加恩今仰體 慈懷著授爲拜他
喇布勒哈番准襲一次○壬寅頒 大行皇太后遺詔○甲辰恭
移 大行皇太后梓宮安奉 壽皇殿 上於順貞門內設倚廬
以居每日親詣奠獻○是月免壽州合肥廬州等二十州縣衛康
熙六十一年旱災額賦有差

六月己酉諭刑部熱審減等國朝舊有成例蓋念時當盛暑囹圄之地倍覺炎蒸笞杖所加更爲酷烈故特予減等以昭法外之仁迨後日久弊生罪人妄希巧脫胥吏因緣爲姦故延日期致逃法網是以停止熱審減等之例以杜弊端我 聖祖仁皇帝如天好生凡閱讞章哀矜詳慎秋審決囚屢行停止至每歲夏月必 時沛恩綸監候者寬其刑具枷責者緩至秋涼雖停熱審之例仍寓減等之心恩至渥也朕仰體 聖慈時深欽恤嗣後每逢熱審之期仍復減等舊例其監禁重犯亦量加寬恤至情罪可疑及牽連待質人等暫予保釋俟秋後再行拘禁凡內外讞獄衙門一體詳慎遵行庶幾刑期無刑之意其有故意遲延仍蹈前弊希圖漏網者除本犯不准減等外官吏嚴加議罪爾部卽通行直省尋議熱審減等自奉 上諭之日起立秋日止直省一體遵行從之○乙

卯諭理藩院郭爾羅斯乏食爾等議將鄰近札薩克公巴圖旗下倉糧撥給散賑等語殊未妥協若將此項倉糧撥給將來伊旗下饑遇旱災又將何處米石撥給乎朕思白都訥貯存倉糧頗多可備散賑之用但止給與米糧餬口並無產業營生亦非久遠之計從前給產業買牲餽之事俱將富戶派出以致苟且塞責所給之物浮報數倍蒙古並不得實惠夫科爾沁一旗與別部落蒙古並同太祖高皇帝時首先臣服且爲朕皇曾祖妣孝莊文皇后皇祖妣孝惠章皇后之母家世爲國戚恪恭翼順歷今百有餘年今聞伊屬下之人乏食朕心軫惻著卽動用正項錢糧三萬兩往賑再派出大臣一員司官一員往郭爾羅斯旗下將實在窮苦並無牲餽之人查明數目按其戶口給與羔羊牛隻務令寬裕足用爾衙門會同總理事務王大臣速議具奏尋議白都訥倉內發

米二萬石按口給糧戶部撥銀三萬兩採買牲畜遣都統伯四格等馳驛前往賑給從之○己未免江蘇地丁蘆課積逋○加封

孔子先世五代俱爲王爵木金父公爲肇聖王祈父公爲裕聖王防叔公爲貽聖王伯夏公爲昌聖王叔梁公爲啟聖王○實授托時戶部右侍郎○庚申諭戶部兵部朕治安天下欲兵民並得其所比年以來策妄阿喇布坦狂逞逆命發師致討四川陝西進藏官兵經歷險遠往返勞苦朕深憫念其倒斃駝載馬匹價銀及口外沿途與西藏留駐兵丁續補駁馬價銀著悉免追賠又西郵軍興以來民間急公趨事實廬朕懷聞陝西甘肅二屬各州縣衛所地丁銀每錢額外徵收三釐米每斗額外徵收三合以爲備荒之用徒有加賦之名究無賑濟之實著自雍正元年始將額外徵收銀米永行停止如有舊欠亦悉蠲除務俾均霑實惠以副朕鴻念

兵民至意○辛酉命京師八旗兵無恆產者移駐熱河喀喇河屯
樺榆溝墾田○壬戌署撫遠大將軍貝子延信奏據青海郡王額
爾得尼額爾克托克托奈來稱羅卜藏丹津等領兵來侵率兵交
戰四次屬下人多陣亡其餘亦逃散又將牲畜劫掠今率妻子來
投乞賜救援等語臣令伊等暫住蘇油口內奏入命遣官慰撫之
○癸亥以三秦爲禮部右侍郎山內閣學士還○甲子河決中牟命僉都
御史嵇曾筠往偕巡撫總河塞之並查賑被水州縣○遣副都統
廣福等往巴衍喀喇大山致祭黃河源○署撫遠大將軍貝子延
信奏青海公噶爾丹達錫來至甘州據稱率弟台吉鄂齊爾台吉
阿旺達克巴領兵與貝勒阿爾布坦溫布等相拒我兵敗散賊人
肆行搶奪來投進口等語臣已令噶爾丹達錫暫與伊叔額爾德
尼額爾克托克托奈同居報聞○丙寅 上詣 大行皇太后梓

宮前行大祭禮釋服 上始回養心殿○丁卯總理王大臣等官會議恭請 四后同祔 聖祖廟 尊諡並加仁字諭朕惟 母

后升祔 太廟 大典攸關欲伸臣子之孝思必準前代之成憲務得情理允協乃可昭示萬年諸王大臣等奏請 四后同祔

太廟引據宋朝太宗眞宗四后祔廟之禮朱子及有宋諸儒皆以爲允當覽奏旣得展朕孝敬無窮之心復合前代斟酌盡善之典不覺悲慰交集恭惟 孝誠仁皇后元配 宸極 孝昭仁皇后

孝懿仁皇后繼位中宮 孝恭仁皇后誕育朕躬母儀天下按先儒祔廟之儀一元后一繼立一本生以次並列今 母后升祔

位次當首奉 孝誠仁皇后次奉 孝昭仁皇后次奉 孝懿仁皇后次奉 孝恭仁皇后如此庶於古禮符合而朕心亦安矣○

以嵇曾筠爲兵部左侍郎

由左僉都御史遷

○壬申追封

聖祖敏妃爲

皇考皇貴妃○諭直隸巡撫李維鈞畿甸之內旗民雜處向日所在旗人暴橫小民受累地方官雖知之莫敢誰何朕所稔悉爾等奮勉整飭不必避忌旗漢冰炭之形迹不可畏懼王公勳戚之評論卽皇莊內有擾害地方者毋得姑容皆密奏以聞○河南巡撫石文焯奏河南永城等處蝗蟲飛集得旨蝗蝻生發盡力捕捉乃不成災考古捕蝗惟有撲滅之法甚善若怠忽從事捕不盡力而委之天災者皆誤也○甲戌以衡鑒公慎議敘順天考官加朱軾太子太傅張廷玉太子太保○乙亥諭吏部兵部三年舉行大計五年舉行軍政其居官優者列爲卓異劣者分別輕重置之八法所以激敘官方勸善懲過典至重也朕思卓異八法所舉所劾不過十數人而平等供職不列舉劾者尙有多員如文員倉庫之盈虧辦事之能否武官騎射之優劣訓練之勤惰皆未填註考語

是考課羣吏尙有遺漏之處也嗣後大計軍政除卓異八法照例舉行外其平等官員文職自知縣以上武職自守備以上俱於大計軍政之年令督撫提鎮註明考語造冊報明吏兵二部務期秉公覈實不得徇情任意顛倒是非爾等確議具奏尋議嗣後不入舉劾文武官督撫提鎮等秉公填註考語送部察覈從之○諭戶部各倉監督向有年限滿漢一同更換立法最善前任若有未清後任豈可接受所以稽錢糧之出入而除虧空之弊端也惟通州坐糧廳貯有通濟庫每年動用輕齎等項司其出入關繫錢糧數十萬兩而坐糧廳一差並無年限或滿員升轉則更滿員或漢員升轉則更漢員滿漢參差更換彼此牽制回護勢難徹底澈清況在任日久儻有虧欠必致積累增多更難清理爾部可將通濟庫錢糧逐一確查務期明晰其坐糧廳一差嗣後或限二年或限三

年滿漢一同更換庶接受之際不至含糊而弊端亦自此清釐爾
部卽確議具奏尋議坐糧廳三年一次滿漢一同更換定爲例從

之○以朱絳爲廣東按察使

由華高道遷

○丙子諭內閣旗員爲外吏

者每爲該旗都統等官所制注選取結勒索重賄得缺後復遣人
需索五旗諸王分外苛求或縱門下人員肆意貪索以致該員竭
蹙餽送虧空公帑嗣後如有仍蹈前轍許本官據實密詳督撫轉
奏督撫容隱卽揭都察院轉奏各御史亦得據揭糾參○諭領侍
衛內大臣等奉天地方乃我國家啟祥之所甚屬緊要朕前詣奉
天聞地方人言論悉知兵丁差役煩多不能休息之處曾降諭旨
令將軍唐保住將無用堪哨悉行撤退而將軍副都統於定額親
隨兵丁之外多帶百餘人省城官員又各帶其子弟因而屬員效
尤各多帶兵丁以致應差乏人兵丁仍多勞苦又於槍手中以選

擇熟練之人爲名每城調取二三十人田獵夫省城相隔遙遠往返人馬俱疲再自山海關以至廣甯皇莊頭三百有奇止交筆帖式領催等微末人員駐紮中後所催徵錢糧辦理事務以致交結匪類羅賣官糧漁利入己且自中前所至錦州義州廣甯等處相隔二三百里詞訟案內干連之莊頭地方官調取抗不赴審即使到案亦抗不遵行以致案內干連之人每多苦累再人命案件呈報地方官之後雖相距數百里亦必俟筆帖式領催檢驗炎暑日久難以憑信則百方檢驗慘不可言朕之所聞如此從前雖每年派卿員前往管轄莊頭因不實心辦理於地方並無裨益應遣大臣一員駐紮於甯遠錦州大凌河等地方令其料理一應公務管轄里長獵戶遇有詞訟事件會同地方官審結此所遣官員應令駐紮何處著領侍衛內大臣兵部內務府總管公同詳議具奏○

命外任文武官員除特參貪酷外其因公註誤降革解退之員將
任內錢糧案件完結之後各親赴都察院具呈十日一次彙題代
奏有可取者酌量錄用○佟吉圖緣事革職以須州署山東布政
使由太僕寺少卿遷○是月免東明長垣二縣康熙六十年水災額賦有
差